

यूहन्नाए उरेंःव दर्सन

आव पोस्तोको येसु ख्रीसए ओसाची यूहन्नाए प्राइरानी छींताव ओसरो ज़। नो बेलाक यूहन्नालाई पत्मोस तापुत सगर्द यानैज्याव (दर्सन १:६)। नोए दर्सनल सात पोकाव मन्दलीरालाई येसुए ओरासिडारो सोनो ओरासम्जैव रेंःज्या (१:१०-३:२२)। आव मानुवात ताधु पाँर सोनो मानुवा खेमन्या बेला पैकाव पाँर मनी रेंःज्यार। नो खेमन्या बेलाक ज़ येसु बनै ज़गै मगैवस स्वर्गनी हुद, ओलकिन तँदाडावरालाई सजा याएरिज्याव (२०:११-१५)। नकिन साःरो नाम नमल ओल उमींरास लिद यापरमेस्वर ब तान्या ले (२१:१-२२:६)।

छींनी हुन्या पाँर

१ आलाव पाँर येसु ख्रीसनी ‘छींनी इताव तारिज्या’ लिद हुन्या पाँर सर्सिउ लिज्या। नो पाँर उमीं-रालाई सतेंदचान्याए जूंनी परमेस्वरए ओल ओज़ालाई जैक्यो। नो ओज़ाए स्वर्गताव ओचाकज्यालाई डा ओनोकोर यूहन्नाए डाल्योक परींद नो पाँर सतेंदचाँक्यो। २ डा यूहन्नाए परमेस्वरए ओपाँ येसु ख्रीसए सतेंद

ओयाँव डारेंःव भरी साची डाएज्या। ३ आलाव सर्सिउ हुन्या पाँर जोए प्ररिद थैद दोज्याव, नो मिँ असिक दैव लिज्या। आव पाँर योःन्या नजिकक ज़ लिज्या।

सात पोकाव मन्दलीरालाई परमेस्वरए ओअसिक

४ डा यूहन्नाए जे एसिया खन्दलाव सात पोकाव मन्दलीरालाई है डादा-चिज्या — डादाकिन ज़ लिज्याव,

आख ब लिज़्याव, छींङ पै ब लिज़्याव परमेस्वरए जेल्योदा उयुं गराँद जेयुंर होलाँ जैद ओयाचिउक। नो असिक उसिंहासन डाकाव लिज़्याव सात गोता पुरूसनी ५सोनो येसु ख्रीसनी ब ओताक। येसु ख्रीस ज़ सतलाव ओसाची, सिउनी सोज़्यावराए याडाताव, आव मानुवाताव राजाराए याराजा।

गेल्योदा उयुं नाद उजिउ भाःदचाद उभीए गोपापरानी सछैंद पले-द, ६गेलीई ओराज्याल लाँद, ओबाबु परमेस्वरए ओसेवा दान्या पुजारीर जैसिक्यो। नोलाई बनै ज़गै मगै ब ओताक, नाम नम ओचलैज़्याव ओहक ब खर्क ज़ माखेन्त्या ओताक। आमेन।

७चिऊच्यो, येसु नमतिन बादलरास उहुक प्राई मीए ज़ ओललाई रँःन्या लेर।

ओललाई घोइद सैःज़्यावराए मनी रँःन्या लेर।

आव मानुवाताव प्राई जातलाव मिँराए नोलाई यारँःक चिर्लनी बिर्ल घन्या लेर।

हैज़ ओताक। आमेन।

८गेप्रभु परमेस्वरए है लिज़्या, “डा अल्फा सोनो ओमेगा ज़।[†] डा माहान परमेस्वर ज़, डादाकिन ज़ लिज़्याव, आख ब लिज़्याव, छींङ पै ब लिज़्याव ज़।”

ख्रीसए ओदर्सन यूहन्नाए उरँःव


९डा यूहन्ना जेस परमेस्वरए ओराज्याल सिप ताद येसु ख्रीसए उमिनताव दुखर ब जेस सिप सहिज़्याव जेदाज्युलाई परमेस्वरए ओपाँत येसु ख्रीसए ओसाची डातावए पत्मोस यादोज्याव तापुत सगर्नाकेर। १०नक प्रभुए उदिन छचाम छैंव पुरूसए ब्याल्द डाछींक तोबो भोंकरए बनै घ्योःव ओर्गा मिताव डाथैके। ११नो गाए, “नँ नरँःज़्याव भरी तोबो पोस्तोकोल सर्द एसियालाव सात पोकाव मन्दलीरालाई परींद याएके — तोबो एफिससल, तोबो स्मुर्नाल, तोबो पर्गाममल, तोबो थिआतीराल, तोबो सार्दिसल, तोबो फिलादेल्फियाल, तोबो लाउदिकियाल।”

१२हाःत ज़ नो डास पाँज़्याव गा काता ओताव लिद डाछींदा

†१ः८ अल्फा सोनो ओमेगाए ओअर्थ — ग्रीक लिपील प्राइरानी डाताव अछेर सोनो प्राइरानी छींताव अछेर ज़।

१ः४ प्रस ३ः१४ १ः५ यसै ५५ः४; भज ८६ः२७ १ः६ प्रस १६ः६

१ः७ दान ७ः१३; जक १२ः१० १ः८ प्रस ३ः१४



(१:१२-२०)

डाभाल्सिक सात गोता सुनए दिउ बाल्न्यार डारारँ:के। १३नो दिउ बाल्न्याराए खार्ल तोबो मिं मिन्सिउ स्यासोलाई डारँ:के। नो उखँत पै बाव रेरे बेन्बेनो क्वा क्वाइसिद उलिङ्ग्याव, ओछातीत सुनए पाता पो:सिउ उलिङ्ग्याव। १४नोए ओडैताव ओचेम सन मिताव स्रोनो पोम स्यासो पालो उलिङ्ग्याव। उमी में:ए मुल्का स्यासो उलिङ्ग्याव। १५उखँर में:ल उजालैसिउ पितल स्यासो तिलिक तिलिको उलिङ्ग्याव। ओर्गा भैए ओर्गा मिताव ज़ ओथास्ज़्याव। १६वोर्फताव उकुइत सात गोता सोरोर यालिङ्ग्याव। ओया:त आनी हुनी ओधार ल्यो छाव

तरवाली मिताव पले:द ओनैङ्ग्याव। ओडा: भरी भार भारो निमी स्यासो उलिङ्ग्याव।

१७डा नोलाई डारँ:व प्राइंना सिउ मिताव ताद उखँत डापछारिसिके। नोए वोर्फताव उकुइ डाक्याँत नैद, “नँ ताछे:नी, डा प्राइंरानी डाताव, प्राइंरानी छींताव ज़ डालिङ्ग्या। १८डा जीदो ज़ डालिङ्ग्या। डा तखेप सिद फरी खर्क ज़ मासिन्या ताद डाले। मिंरालाई नर्गल भा:द सै:न्या, नर्गनी पले:द बाँचै:न्या साँचा डाकुइत लिङ्ग्या। १९है जैद नँ आव नरँ:व भरी, आख ताङ्ग्याव पाँर स्रोनो छींनी हुन्या पाँर सर्द नैके। २०नो वोर्फताव डाकुइताव

नरँःव सात गोता सोरोर स्रोनो नो सात गोता सुनए दिउ बाल्‌न्याराए याअर्थ आव ज़ — नो सात गोता सोरोर सात पोकाव मन्दलीराए यालोम्बार ज़,† नो सात गोता सुनए दिउ बाल्‌न्यार सात पोकाव मन्दलीर ज़।”

एफिससलाव मन्दली

२ “एफिसस मन्दलीलाव लोम्बालाई अइ लिद सर्दिके —

नो सात गोता सोरोर वोर्फताव उकुइत दाद, सात गोता सुनए दिउ बाल्‌न्या खार्ल दुलिज़्यावए है दाचिज़्याव,

२जे बनै चावस थ०रिद धामास जेदोज़्याव येन डा ड़ासैंज़्या। बलेःज़्याव मिँरालाई ब जेखार्ल जेमारासहिए। यानी ज़ येसुए ओसाची मिताव जैसिद बारिज़्यावरालाई मनी जाँचिद यापाँ धुत थ०रैद जेराएज़्या। ३जे बनै थ०रिद ड़ामिनताव दुखर सहिन्या जेचर्या मासिए लिन्या ब ड़ासैंज़्या।

४खाली जेडैत आव पाँ वाज़ लिज़्या — जे उस०कताव ड़ाल्योदा जेयुँ थू जेजैज़्याव

मिताव आज्याल ते माले। ५है जैद जे कान्किन मेदा जेतेव हो चेतैद जेयुँर त़ोद फरी ड़ादाडाव जेदोज़्याव मिताव ज़ दोचिके। जेमादोकिन जेल्योक हुद जेदिउ बाल्‌न्या ओपोतिन डाहाइरिज़्या। ६हैदी ब आःपै जेस तोबो गुन ते लिज़्या — निकोलाइतस यारादोज़्यावराए यायेनलाई जेसोज़्या। नोरालाई डा मनी ड़ारासोज़्या।

७आव पाँर जोए थैन्या उयुँ लिज़्या, होए छैव पुरूसए मन्दलीरालाई है ओरादोव पाँर ओथैवक। आव पाँत जो भेंःस्या ताज़्या, होलाई परमेस्वरए ओबगैचाल लिज़्याव अजम्बरी जुनी याज़्याव सै ज़्याव ड़ाएरिज़्या।”

स्मुर्नालाव मन्दली

८“स्मुर्ना मन्दलीलाव लोम्बालाई अइ लिद सर्दिके —

आव पाँ प्राइँरानी ड़ाताव, प्राइँरानी छींताव, सिद सैसिउए है दाचिज़्याव,

९जे जेदुखर ब ड़ारँःज़्या, जेस काता ज़ ओमालिज़्याव ब

†१:२० छुत बुफिन्या — सात पोकाव चाकज्यार।

२:७ उत ३:६; इज २८:१३; ३१:८ २:८ यसै ४४:६; ४८:१२

डासैँज्या। हैदी ब प्राइंनी योःव ज़ जेलिज्या। नो सैतानए ल्योदाडाव 'गे यहूदीर ज़'† है लिज्यावराए जेडैत माचाव पाँर भाःद यायाचिज्याव ब डासैँज्या। १० नो जेदैरिज्याव दुखरानी ताछेःच्यो। सैतानए जेलाई जाँचिन्याए जूंनी ख्वा ख्वारालाई भ्यालखानाल ब भाःचिरिज्याव। निताव दुखर दस दिन पै वाज़ तारिज्या। जेजिउ ओबादी ब सिन्याक पै डासतत जेलिकिन, डा जेलाई अजम्बरी जुनीए इनाम यान्या डाले।

११ आव पाँर जोए थैन्या उयुँ लिज्या, होए छैँव पुरुसए मन्दलीरालाई है ओरादोव पाँर ओथैवक। आव पाँत जो भेंःस्या ताज्या, नो मिँ नर्गल बाव मापरिए।”

पर्गाममलाव मन्दली

१२ “पर्गामम मन्दलीलाव लोम्बालाई अइ लिद सर्दिके —

आनी हुनी ओधार ल्यो छाव तरवालीस लिज्यावए है दाचिज्याव,

१३ जे जेपोल सैतानए ओराज्या लिज्या लिन्या डासैँज्या। हितावत मनी डामिनत थ०रिद डापाँ जेमारास्ज्याव ब डासैँज्या। निताव सैतानए ओराज्याल डासतत लिज्याव डासाची एन्तिपासलाई जेखार्ल यासैःक मनी जेयेन जेमारास्के।

१४ खाली जेडैताव पाँर तोबो नेब्लो लिज्यार। जेखार्नी ख्वा ख्वाराए बालामए ओदोव मिताव येन दोज्यावर लिज्यार। नो बालामए इस्माएलीरालाई पापल पारैन्याए जूंनी तोबो बालाक यादोज्यावलाई चें थाँव उपरींव मिताव ज़ ताके। ननी ज़ नो इस्माएलीराए अङ्ग्या-लाई चरैःसिउ ज्यावर ज्याद, पातज्या पातर्नी जैसिद या मनी भुथो ज़ तानाकेर। १५ हिताव ज़ फरी जेखार्नी ख्वा ख्वार निकोलाइतस यारादोज्यावराए यापाँ दान्यार ब ताकेर। १६ है जैद जे हतप्त ज़ जेयुँर तोचिके, मानी नो डायाःताव आनी हुनी ओधार ल्यो तरवालीस जेल्योक हुद नोरास लरें दान्या डाले।

† २:६ छुत बुभिन्या — गे परमेस्वरए ओथोर ज़।

२:१४ गन्ती २२:५,७; २५:१-३; ३१:१६; ब्य २३:४

१७ आव पाँर जोए थैऩ्या उयुँ लिऒ्या, होए छैँव पुरूसए मन्दलीरालाई है ओरादोव पाँर ओथैवक। आव पाँत जो भेंःस्या ताऒ्या, होलाई मोँसिउलाव मन्न डाएरिऒ्या, सोनो तोबो साःरो मिन सर्सिउ पाल पालो लुँ ब डाएरिऒ्या। नो मिन नोए वाऒ सैऩ्या ले।”

थिआतीरालाव मन्दली

१८ “थिआतीरा मन्दलीलाव लोम्बालाई अइ लिद सर्दिके —

उमी मेंःए मुल्का मिताव, उखँ उजालैसिउ पितल स्यासो लिऒ्याव परमेस्वरए ओऒाए है दाचिऒ्याव,

१९ जे बनै थंरिद परमेस्वरए ओसतत लिद नै मेंलाई समारिद परमेस्वरए ओसेवा जेदोऒ्याव डारेंऒ्या। नो जेयेनर ड़ादाडाव-किन यादा ज़ ताद ले।

२० खाली जेडैत तोबो पाँ वाऒ लिऒ्या। नो परमेस्वरए उपुरूस चरिद पाँव जैसिऒ्याव ईजेबेल मेंमालाई जेखाल जेसुम्ऒ्या। नोए डासेवा दोऒ्याव डामीरालाई

तँदा लाँद पातऒ्या पातर्नी येनर दाव परींद, अडग्यालाई चरैःसिउ ज़्यावर ज़्याव यापरींऒ्याव।

२१ डा नो मेंमालाई उयुँर त्तोन्या मौका डाएके, खाली नोए ओयेनर रासो ज़ माभैःए।

२२ है जैद डा नोलाई आकिनी ओस्याँऒ्याव तैलाई ओजोरो हुव स्याँन्या तै जैद डाएरिऒ्या।

ओल्योदा बाऒ्यावरालाई मनी यायुँर यामात्तोकिन बनै छे छे डम्सिउ दुखर डाराएरिऒ्या।

२३ नोए ओऒारालाई नुल्पा नुल्मा जैद डाराखेम्रिऒ्या। हाःकिन मिँराए यायुँ याकलर ज़र्लापद डाराएऒ्याव प्राईँ मन्दलीराए सैऩ्या लेर। डा जेलाई सु सु जेयेनए ओजेला ड़ायाचिरिऒ्या।

२४ जे उपुर्काव थिआतीराल लिऒ्यावर ते निताव सैताननिकाव हुव ‘बनै ओअर्थ ल्यो ओलेखा ल्यो पाँ’ है यादोऒ्याव पाँत माबाद साचो येमदा ज़ जेबाऒ्या। है जैद डा जेलाई उपुर काता ज़ है डामादाचिए, २५ खाली जेस लिऒ्यावलाई मारास्द डा डामाहुवा पै थंरिद लिच्यो।

२:१७ प्रस १६:१४-१५; १६:३३-३४; यसै ६२:२; ६५:१५

२:२० १ राज १६:३१; २ राज ६:२२,३० २:२३ भज ७:६; ६२:१२; यर १७:१०

२६ आव पाँत जो भेंःस्या ताद छींङ पै डायेनत थ०रिञ्या, डा होलाई प्राइँ राज्याराए याडैताव जैन्या डाले। २७ किताव डा मनी डाबाबुए ल्योनी निताव हक रैद डानै, हिताव ज़ डा नोलाई ब यान्या डाले। नो याडैताव ताद उकुइत भँए भुइ रैद गम जा मितावरालाई छिलिङ्गा छिलिङ्गा ख्यान्या ले। २८ डा नोलाई छकालन्याकाव सोम्पा ब यान्या डाले।

२६ आव पाँर जोए थैन्या उयुँ लिञ्या, होए छैँव पुरूसए मन्दलीरालाई है ओरादोव पाँर ओथैवक।”

सार्दिसलाव मन्दली

३ “सार्दिस मन्दलीलाव लोम्बालाई अइ लिद सर्दिके —

ओलस परमेस्वरए सात गोता उपुरूसर लिञ्याव, उकुइत सात गोता सोरो लिञ्यावए है दाचिञ्याव,

जेयेन भरी रँःद डानै। जे जेमिन चाव ओतादी ब जेयेननी ते काम मालागिउ सिउ स्यासो ताद जेले।

२ है जैद जे सैसिद माव पैञ्याव रहिउ जेयेनरालाई याराजागैचिके। जेयेन भरी परमेस्वर डाबाबुए ओङ्काक काता ज़ योःव डामारँःताए। ३ है जैद परमेस्वरए ओपाँ कितावनी जेदैव, कितावनी जेथैव हो चेतैद, जेयुरँ तोद हितावनी ज़ दोचिके। जे फरी सैसिद जेमालिकिन डा कुना हुञ्याव मिँ स्यासो सुए ज़ यामासैँद जेल्योक उमँःजानी डाहुरिञ्या।

४ हैदी ब नो सार्दिसल लिञ्यावरानी ख्वा ख्वाराए ते आःपै याक्वात हिला मासगाल्तार। नोर डास पालो क्वा क्वाइसिद बारिन्या लेर। नोर वाज़ निताव दैन्याकावर लिञ्यार। ५ है जैद आव पाँत जो भेंःस्या ताञ्या, होए पाल पालो क्वा क्वाइसिरिञ्या। डा नोलाई अजम्बरी जुनीलाव पोस्तोकोल सर्सिउ उमिन क्याल्दचान्या डामाले, बुरू डाबाबु सोनो ओचाकज्याराए याङ्काक उमिन ज़ सथास्दचान्या डाले।

६ आव पाँर जोए थैन्या उयुँ लिञ्या, होए छैँव पुरूसए



मन्दलीरालाई है ओरादोव पाँर ओथैवक।”

फिलादेल्फियालाव मन्दली

७ “फिलादेल्फिया मन्दलीलाव लोम्बालाई अइ लिद सर्दिके —

ओखत माल्यो छैव, सतस लिङ्याव, दाऊदए ओराज्यालाव साँचा नैङ्यावए स्वर्गताव ग्राम फैन्या स्रोतो गल्न्या ओल उकुइत ज़ लिङ्या। ओफैक सुए ज़ मागल्धुर, ओगल्क सुए ज़ माफैधुर। निताव उकुइत नैङ्यावए है दाचिङ्याव,

८ जेयेन भरी डासैङ्या। जेसक्ती छया उलिदी ब डापाँ दाद डामिनत जेलाज ओमाहुवए जेङाक तोबो ग्राम फैद नैद डायाचिए। नो ग्राम सुए ज़ मागल्धुर। ९ नो सैतानए ल्योदा-डाव ‘गे यहूदीर ज़’ है लिद धुतैङ्यावरालाई तछा जेखँत फुलुप्सिउ डारापरीरिङ्या। हो ताकिन डा डायुँ जेस उलिङ्याव ओल्यो लिन्या याज़ सैन्या लेर। १० जे बनै थ०रिद डापाँ भरी धिद जेदोवए आव मानुवाताव मिँ

भरिरालाई जाँचिन्याए जूनी बनै धो सहिउ दुखर भाःद डाराएक जेलाई ते नो दुखरानी पाथस ज़ डापले-चिरिङ्या।

११ डा हतप्त ज़ डाहुरिङ्या। जेदैरिङ्याव इनाम सुए ज़ माछकै-धुन्याए जूनी जेस लिङ्याव डापाँर डासतर मारास्द दोच्यो। १२ आव पाँत जो भेंःस्या ताङ्या, होलाई परमेस्वर डाबाबुए उफिमलाव खाँबा मिताव डाजैरिङ्या। नो ननी खर्क ज़ भोस्न्या माले। डा नत स्रोम्लो मिन डासरिङ्या, तोबो परमेस्वर डाबाबुए उमिन, तोबो स्वर्गतिन हुङ्याव परमेस्वरए ओसहर साःरो यरूसलेमाए उमिन, तोबो साःरो डामिन।

१३ आव पाँर जोए थैन्या उयुँ लिङ्या, होए छैव पुरूसए मन्दलीरालाई है ओरादोव पाँर ओथैवक।”

लाउदिकियालाव मन्दली

१४ “लाउदिकिया मन्दलीलाव लोम्बालाई अइ लिद सर्दिके —

उमिन ‘आमेन’ लिङ्याव, ओबाबुए ओसतत लिद थ०रिउ



साची याज्ञ्याव, परमेस्वरए
ओस्रिस्तीलाई थालिदयाज्ञ्यावए
है दाचिज्ञ्याव,

१५जे जेयेन भरी डारं:ज्ञ्या, जे
डायेनत राव ब जेमाले, छेरो ब
जेमाले। की राव वाज़, की छेरो
वाज़ जेताकिन तान्या ओल्यो।
१६खाली जे की राव की छेरो
माताद नोल नोलो वाज़ जेतावए
डाया:नी डारै:चिरिज्ञ्या।

१७जे है जेलिज्ञ्या, 'गे यादा
ताद प्राईनी यो:द धनी ताद
गेले, गेलाई काताए खाँचो ज़
माले,' है जेलिज्ञ्या। जे ते भन
काता ज़ माल्यो, नाङग्या, युँ
नाव, छाम छामो ताद जेलि-
ज्ञ्यावदा जेमासैए। १८डा जेलाई
तोबो पाँ डायचिज्ञ्या, जे
साचो धनी तान्या ताकिन डा
डाल्योनिकाव में:ल उजालैसिउ
सुन लँ:चिके। नो नाङग्या पात्या
ताद जेलिज्ञ्यावनी जेलाजर
कण्ण्या ताकिन डाल्योनी पालो
क्वार लँ:द क्वाइसिचिके। नो
छाम छामो ताद जेलिज्ञ्यावनी
जेमी सरै:न्या ताकिन डाल्योनी
मील भा:न्या मलम लँ:द
थीचिके।

१९जोलाई डा मया डादोज्ञ्या,
होलाई हप्कैद डाम-लैज्ञ्या। है
जैद जेयुँर मासतेद जेयुँर तोद
डायेनत कलँ लिचिके। २०डा
ग्रामक च्याँ:सिद कोतो कोतो
डाजैक जोए डार्गा थैद ओग्राम
फैज्ञ्याव, डा होए उफिमल पसिद
होस नै नै ताद ज़्यावर ब सिप ज़
ज्ञ्यान्या गिन्ले। २१आव पाँत जो
भै:ज्ञ्या, होलाई डारिहासनत
डास सिप चुसिउ यान्या डाले।
डा मनी ड़ादा डाभै:वए
परमेस्वर डाबाबुए उरिहासनत
ओलस सिप चुसिद गिन्ले।

२२आव पाँर जोए थैन्या
उयुँ लिज्ञ्या, होए छैव पुरुसए
मन्दलीरालाई है ओरादोव पाँर
ओथैवक।”

स्वर्गताव राजा

४ आव भरी डारं:वत फरी स्वर्गत
तोबो ग्राम फैसिउ डारं:के।
हा:त ज़ नो ड़ादाडाव डाथैव भोंकरए
ओर्गा मितावए फरी ब डास अइ लिद
पाँके, “आत डाल्योत हुन्के, नँलाई
छीनी हुन्या पाँर सतैद डारिज्ञ्या,”
२ है ओदाँव प्राईना ज़ डाक्याँत
परमेस्वरए उपुरुस हुद भजल्किद

स्वर्गत तोबो सिंहासन डारैःके। नत तोबो राजा चुसिद उलिङ्याव। ३नो राजाए ओज्जगै ज्वाँड ज्वाँडो यूँखार स्यासो ओरैःज्याव। ज्जगै ज्जगैव मुगा स्यासो ब ओरैःज्याव। सिंहासन घवाँगिल फिली मिलिउ रिगाउँ स्यासो ओरैःज्याव। ४नो सिंहासन घवाँगिल छुत चौबीस गोता सिंहासनर यालिङ्याव। नल चुसिद लिङ्याव चौबीस जना स्मेर, पालो क्वा क्वाइसिउर, सुने मुकुत जासिसिउर यालिङ्याव। ५नो सिंहासननी बिजुली उमिल्किङ्याव, गर्जिङ्याव गार ब याहुङ्याव। सिंहासन ड़ाक सात गोता दिउ बाल्न्यात मेंः तैःसिउ उलिङ्याव। नो मेंःर परमेस्वरए सात गोता उपुरूसर ज़। ६नो सिंहासन ड़ाक छैँ छैँव समुन्द्र स्यासो यूँखार मिताव मैरा ब उलिङ्याव।

नो सिंहासनलाव चार कोन्याक याङ्गानी याछीनी यामी ल्योर चारता जन्तुर यालिङ्याव। ७नो चारतार तोबो ला स्यासो उलिङ्याव, तोबो बाछा स्यासो उलिङ्याव, तोबोए ओडाः मिँए ओडाः स्यासो उलिङ्याव, फरी तोबो भुङ्ग्याव काप्यागा स्यासो उलिङ्याव। ८नो चारता जन्तुर छ छ

गोता याकर ल्योर, याक्याँ भरी ब यामी ल्योर यालिङ्याव। नोराए लाकनी रील चिम मादाद,

“अ परमप्रभु बनै नसक्ती ल्यो
गेपरमेस्वर,
नँ नखत माल्यो छैँव, छैँव, छैँव
नलिङ्या।

ङ़ादाकिन ज़ नलिङ्याव,
आख ब नलिङ्या,
छीँड पै ब लिन्त्या नले,”

है ल्यो ज़ यालिङ्याव। ९नोराए नो याङ्गकाव सिंहासनत चुसिद लिङ्याव, एकमन्या जिउँव ज़ लिङ्याव राजालाई ओमान नैदद्याद, उमिन सघ्योःदद्याद, धन्याबाद याचरैःज्याक, १०नो चौबीस जना स्मेर सिंहासनत चुसिद लिङ्यावए ओङ्गक फुलुप्सिद, नो एकमन्या लिङ्यावलाई धो दाद, याङ्गैताव मुकुतर हाइद उखँक भाःद अइ ल्यो ज़ यालिङ्याव,

११ “अ गोप्रभु परमेस्वर,
प्राङ्गैरानी घेप्पा मिन,
प्राङ्गैराए ल्योनिकाव मान,
प्राङ्गैरानी घ्योःव सक्ती दैन्याकाव
ब नँ ज़ नलिङ्या।

ताव भरी नँ ज़ नजैके,
नयुँ स्यानी ज़ ताकेर।”

पाथा स्रोतो छाप भाःसिउ
पोस्तोको

५ नो सिंहासनत चुसिद लिङ्याव राजाए वोर्फताव उकुइत तोबो आनी हुनी सर्सिउ पोस्तोको डारंःके। नो पोस्तोकोत सात गोता छाप भाःद पोःसिउ उलिङ्याव। **२**हाःत ज़ परमेस्वरए तोबो बनै ओर्सा ल्यो ओचाकज्याए, “नो पोस्तोकोताव भाःसिउ छाप हाइद पोस्तोको फैधुन्या सुवार मालिङ्यार?” है लिद उकिङ्याव डाथैके। **३**खाली नो फैद चिऊधुन्यार स्वर्गत, मानुवात, तल्ना नामल ब यामालिङ्याव। **४**हाःत ज़ नो पोस्तोको फैधुन्यार चिऊधुन्यार सु ज़ यामारादैवए बनै डाघर्के। **५**हाःत ज़ नो चौबीस जना स्मेररानी तोबोए, “ताघर्नी, यहूदाए ओथोलाव ‘ला’ यादोङ्याव, दाऊद राजाए ओजरानी परीव, भंःस्या तावए नो पोस्तोकोलाव सात गोता छाप हाइद फैधुन्याकाव लिङ्या,” है दाँक्यो।

६हाःत ज़ नो चार कोन्याल लिङ्याव जन्तु मितावर स्रोतो चौबीस जना स्मेरराए याखार्ल तोबो सिद सैंसिउ पाथा स्यासो सिंहासन डाक च्याँःसिद

उलिङ्याव डारंःके। नोए उरंःर ब सात गोता, उमीर ब सात गोता यालिङ्याव। नो सात गोता उमीर परमेस्वरए आव मानुवात आदा होदा ओरापरीं व सात गोता उपुरूसर ज़। **७**हाःत ज़ नो पाथा सिंहासनत लिङ्याव राजाए ल्योक बाद वोर्फताव उकुइताव पोस्तोकोलाई रैक्यो। **८**ओरैव प्राईना नो चार कोन्यालाव जन्तु स्यासोर स्रोतो चौबीस जना स्मेरर पाथाए ओडाक फुलुप्सिकेर। नोरास सारङ्गर स्रोतो सुने खुरील भाःसिउ धुपर ब उलिङ्याव। नो धुपर परमेस्वरए छैंव उमीराए पोखारिद याचरैःव यापाँर ज़।

९नक याबाक साःरो गित ब तोबो अइ लिद गैकेर,

“नो पोस्तोको लाँद ओछाप
फैधुन्याकाव नँ वाज़
नलिङ्या।

नँ मिँराए कुइनी सैःसिद,
परमेस्वरए उजूनी

प्राईं राज्यालाव मिँर,

प्राईं जातलाव मिँर,

प्राईं थोलाव मिँर,

प्राईं खामनिकाव पाँङ्याव

मिँरालाई

नजिउ भाःद नभीए नरानिखनैके।

५:१ इज २:६-१०; यसै २६:११ ५:५ उत ४६:६; यसै ११:१,१०

५:६ यसै ५:३:७; जक ४:१० ५:८ भज १४१:२ ५:९ भज ३३:३; ६८:१; यसै ४२:१०

१० नोरालाई परमेस्वरए
ओराज्यालावर जैद
ओसेवा दान्यार नराजैके।

नोराए ज़ आव मानुवात
नँ नराज्या चलैन्या लेर।”

११ हाःत ज़ फरी डाभाल्सिक
सिंहासनत चुसिउ राजा, ओड़ाकाव
जन्तु मितावर स्रोनो चौबीस जना स्रेर
यालिज़्याव घवांगिल परमेस्वरए बनै
कुधु ओचाकज्याराए यार्गा ज़ डाथैके।
नोर हजारका हजार, लाखका लाख
यालिज़्याव। १२नो चाकज्यार प्राइँए
यार्गा तोबो जैद अइ लिद यागैज़्याव,

“प्राइँनिकाव सक्ती, प्राइँनिकाव
धन, प्राइँनिकाव बुद्धी,
प्राइँनिकाव सा, प्राइँनिकाव
मान, प्राइँनिकाव असिक,
प्राइँनिकाव घेप्पा मिन
दैन्याकाव

नो यासैःव पाथा वाज़
लिज़्या।”

१३नकिन परमेस्वरए ओरासिजैवर,
स्वर्गतावर, मानुवातावर, तल्ना नाम-
लावर, समुन्द्रल लिज़्यावर प्राइँए ज़
तोबो गा जैद अइ लिद यागैज़्याव
डाथैके,

“सिंहासनत चुसिज़्याव राजा
स्रोनो यासैःव पाथानिलाई

असिक, मान, घेप्पा मिन
स्रोनो सक्ती ब
एकमन्या ज़ ओताक।”

१४नाः भरिल नो चारता जन्तु
स्यासोराए, “आमेन,” है ल्यो ज़
यालिज़्याव। नो चौबीस जना स्रेर ब
ओड़ाक फुलुप्सिद ओसेवा दोव ज़
यानैज़्याव।

पाथाए पोस्तोकोताव छापर
ओराफैव

६ हाःत ज़ नो पाथाए नो सात गोता
छापरानी प्राइँरानी डाताव छाप
ओफैव डारँःके। नो छाप ओफैव
प्राइँना नो चार जन्तु स्यासोरानी तोबोए
ओर्गा नम ओगर्जिज़्याव मिताव
गर्जिद, “आदा हुन्के,” है ओदाँज़्याव
डाथैके। २होदा डाभाल्सिक तोबो
पालो घोरालाई चेप्सिउ उकुइत ली
ल्योलाई डारँःके। नोलाई तोबो मुकुत
एकेर। नोए ननी बाद ओड़ालाव परिउ
भरी याहारैनाक्यो।

३नकिन फरी नो पाथाए, होए
उछींताव पोस्तोकोताव छाप
ओफैवत नो चारता जन्तु स्यासोरानी
तोबोए, “आदा हुन्के,” है ओदाँज़्याव
डाथैके। ४हाःत ज़ होदा डाभाल्सिक
तोबो घ्यामो घोरा पुलुस्द उहुज़्याव

डारँःके। नो घोरा चेप्सिउलाई आव मानुवाताव मिँरालाई माखैन्त्या जैद या याल सैःसिउ परीन्त्या हक यासिउ उलिङ्याव। नोलाई तोबो घयोःव तरवाली ब यासिउ उलिङ्याव।

५नकिन फरी नो पाथाए नोनी निछीं- ताव पोस्तोकोताव छाप ओफैवत नो चारता जन्तु स्यासोरानी तोबोए, “आदा हुन्के,” है ओदाँङ्याव डाथैके। होदा डाभाल्सिक तोबो मोलो घोरा चेप्सिउ उकुइत तौला ल्यो डारँःके। ६नो चारता जन्तुराए खार्नी तोबो गा अइ लिद ओपाँङ्याव डाथैके, “तछाकाव जेलाए जम्मा तमानु ताम, की सोंमानु चिका तान्या ले। मास सोनो दाखमदचलाई ते चलैन्त्या माःक।”

७नकिन पाथाए नो सोम्लोराए याछींताव पोस्तोकोताव छाप ओफैक नो चारता जन्तुरानी प्राइँरानी छींतावए, “आदा हुन्के,” है ओदाँङ्याव डाथैके। ८होदा डाभाल्सिक तोबो पींल्यासो घोरा चेप्सिउ डारँःके। नोए उमिन ‘सैःन्या’ उलिङ्याव। नोए उछीं उछीं नर्ग ब उहुङ्याव। नोनिलाई आव मानुवातावरालाई चार भानी तभालाई तरवालीनी, अनिकालनी, बेथारानी,

ला निमरानी सैःन्या हक यासिउ उलिङ्याव।

९नकिन पाथाए नो चारता छापराए याछींताव छाप ओफैक परमेस्वरए ओपाँत साची यावर यारासैःवराए यापुरूसर स्वर्गताव थान धूँल डारारँःके। १०नो पुरूसर बनै चोइस अइ लिद याक्रिङ्याव, “अ सतलाव छैँव माहान गेप्रभु, नँ न्याय दाद मानुवातावराए गेलाई सैःद गेभी सोभोद यायासिउ गेखिस खर्क फेरैद नयासिरिङ्याव?” है यालिङ्याव। ११हाःत ज़ नो पुरूसरालाई पालो क्वा तोबो तोबो याद, “जे मिताव परमेस्वरए उमिनताव यारासैःरि- ङ्याव जेनैर यामादुमा पै जे जाँवा सहिद कींव ताके,” है यारादोव डाथैके।

१२नकिन नो पाथाए नो पाँच गोता छापराए याछींताव छाप ओफैक प्राइँना नाम भरी थोनो-सिके, निमी ब मोलो फेरवा स्यासो मोल मोलो ज़ ताके, स्यावै ब भी मिताव घ्याम घ्यामो ताके। १३घयोःव बतासए सीर ओराहलैँक सीं सैर ओरासतेङ्याव मिताव नमताव सोरोर ब नामल तेकेर। १४नम लो माँःती

६:४ जक १:८; ६:२ ६:५ जक ६:२,६ ६:८ इज १४:२१

६:१२ यसै १३:१०; योए २:१०,३१; ३:१५ ६:१३ यसै ३४:४

रूल्सिके, हॉर तापुर यापोनी ज़ भोस्द बाकेर। १५मानुवाताव राजार, मिंराए याघेप्पार, यासेनापतीर, धनीर, हक दैवर स्रोनो बाँदार माबाँदार हॉ खँ जीदा, पुप जीदा मोंसिनाद, १६नोराए, “आव हॉर पहरर गेतरत तेद गेलाई कप्द सिंहासनत चुसिद लिज़्याव राजा स्रोनो पाथाए उरिसनी यामोंसिकिन ताखेहो। १७नोनी निरिस सोभोन्या छचाम हुद ले, नोनी निड़ाक सु ची उरहिधुरिज़्याव?” है यालिज़्याव।

तलाख चवालीस हजार मिंर

७ आव भरी ओतावत आव मानुवाताव चार कोन्याल परमेस्वरए ओचाकज्यार चार जना च्याँ:सिद यालिज़्याव डारारँ:के। नोराए नामल तादी ब, समुन्द्र तर्त तादी ब, सींत तादी ब, बतास ताचलिक लिद नोलाई वैद यानैज़्याव। २हा:त ज़ फरी तोबो चाकज्या पुर्ब त०नी उहुज़्याव डारँ:के। नोए उकुइत जींदो परमेस्वरए ओछाप रैद नो चार कोन्याल लिज़्याव नाम स्रोनो समुन्द्र बले:ना हुव चार जना चाकज्यारालाई बनै चोइस है यादोक्यो, ३“गे परमेस्वरए उमिनताव ओबाँदाराए

याचाँदीत छाप भा:द गेमाराएवा पै जे नामलाई ब ताबले-च्यो, समुन्द्रलाई ब ताबले-च्यो, सींलाई ब ताबले-च्यो।”

४हा:त ज़ इस्राएली बाह थरनी नो छाप दैवर तलाख चवालीस हजार ताकेर है याल्यो डाथैके।

५नोर यहूदाए ओथोनी बाह हजार, रूबेनए ओथोनी बाह हजार, गादए ओथोनी बाह हजार, ६आसेरए ओथोनी बाह हजार, नप्तालीए ओथोनी बाह हजार, मनस्सेए ओथोनी बाह हजार, ७सिमियोनए ओथोनी बाह हजार, लेबीए ओथोनी बाह हजार, इस्साखारए ओथोनी बाह हजार, ८जबूलूनए ओथोनी बाह हजार, योसेफए ओथोनी बाह हजार, बेन्यामीनए ओथोनी बाह हजार ताकेर।

स्वर्गताव मागनिसिधुन्या प्राइँ जातलाव मिंर

९आव भरी ओतावत फरी ब डाभाल्सिक सुए ज़ मागनिसिधुन्या प्राइँ राज्यालावर, प्राइँ जातलावर, प्राइँ थोलावर, प्राइँ खामनी पाँज़्याव मिंर बनै माहोल्या यालिज़्याव

६:१५ यसे २:१६,२१ ६:१६ होसे १०:८ ६:१७ योए २:११; मला ३:२

७:१ यर ४६:३६; दान ७:२; जक ६:५ ७:३ इज ६:४-६

डारारँःके। सिंहासनत चुसिद लिङ्याव
राजाए ओड़ाक सोनो पाथाए ओड़ाक
च्याँःसिद नोर प्राइँए ज़ पाल पालो
क्वा क्वाइसिद याकुइत खजुरए
ओस्यावलार रैद, १० प्राइँए तोबो गा
जैद,

“सिंहासनत चुसिङ्याव
गेपरमेस्वर

सोनो पाथानी निल्योनी

अजम्बरी जुनी दैन्या ताद गेले,”

है लिद क्रिउ ज़ यालिङ्याव। ११ हाःत
ज़ सिंहासन, चौबीस जना स्रेर सोनो
चारता जन्तु स्यासोर यालिङ्याव
घवाँगिल च्याँःसिद लिङ्याव
चाकज्याराए परमेस्वरए ओड़ाक
फुलुप्सिद धो दाद है लिकेर,

१२ “आमेन। गेपरमेस्वरलाई खर्क ज़
माखेम्न्या असिक,
ज़गै मगै, बुद्धी,
धन्याबाद, मान, सक्ती,
ओर्सा ल्यो ब ओताक। आमेन।”

१३ हाःत ज़ नो चौबीस जना स्रेरानी
तोबोए डालाई, “आव पालो क्वा
क्वाइसिउर सुर, कातानी हुवर, नँ
नमासैँज्या?” है ओदाँक ते, १४ “प्रभु,
डा ते डामासैँए। नँ ते नसैँज्याखेहो,”
है डादोक ते, नोए डालाई, “आवर

मानुवाताव घेप्पा जाँचरानी पुलुस्द
हुवर ज़। नोराए याक्वार पाथाए छैँव
उभीए छेद सपाल्द नैर।

१५ है जैद ज़ नोर परमेस्वरए
उसिंहासन डाक ल्यो दैद

ओल उलिङ्याव छैँव पोल

लाकनी रील

ओसेवा दाव ज़ नैँज्यार।

नो सिंहासनत चुसिङ्यावए फरी

नोरालाई कप्द

पाथस नैन्या ले।

१६ नोर खर्क ज़ करेन्त्या मालेर,

री ब छोस्न्या मालेर,

निमीए ओदारए हिप्द घाम सोता
सोता ब तान्या मालेर।

१७ नो सिंहासन डाक लिङ्याव पाथा

नोराए यागै गावला ताद

पाथस नैद,

अजम्बरी जुनी याङ्याव रीमुलदा

लाँद री सवैन्या ले।

ओल परमेस्वरए ज़ प्राइँराए

यापिलर सीदचान्या ले।”

पाथाए प्राइँरानी छींताव छाप
ओफैव

नकिन नो पाथाए प्राइँरानी
छींताव छाप ओफैक स्वर्गत



आधा घन्ता पै साइँसुइँ ताके।
२नकिन परमेस्वरए ओड़ाकाव
सात जना ओचाकज्यार डारारँके।
नोरलाई सात गोता भोंकर याद
ओरानैज्याव।

३हाःत ज़ परमेस्वरए छुत तोबो
ओचाकज्या हुद धुप भाःन्या सुने
जा उकुइत रैद सिंहासन डाकाव सुने
थानक च्याँःसिहुके। नोलाई नो थानत
परमेस्वरए छैँव उमींराए यापोंखारिउ
पाँत चाःदयान्याए जूनी कुधु धुपर
याद यानैज्याव। ४नो धुपए उमिकुइ
परमेस्वरए छैँव उमींराए यापोंखारिउ
पाँस थोम्सिद नो चाकज्याए उकुइनी
ज़ परमेस्वरए ओड़ाक केस्के। ५हाःत
ज़ फरी नो चाकज्याए नो थानताव मैरैः
ओजाल भाःद मानुवात ख्याक्यो।
ओख्याव प्राइँना ज़ नम बनै गर्जिद
म्याल्याकनी मिलिक ताद भोंचालो
बाके।

सात गोता भोंकरर

६हाःत ज़ नो याकुइत भोंकर ल्यो
सात जना परमेस्वरए ओचाकज्यार
याभोंकर तप्यात थूसिकेर।

७उस०कताव चाकज्याए ओभोंकर
ओतबो प्राइँना भी बरेःसिउ तिसरै

सोनो मेंः बनै ज़ वाके। नोए मानुवा-
ताव सीर सोंभानी तभा भरी नामस ज़
सघाद चुयाप याजैक्यो। छी भरी ब
ओपोःस ज़ सघाद याखेम्क्यो।

८नकिन नोए उछींताव चाकज्याए
ओभोंकर ओतबोत बनै घ्योःव हाँ
स्यासो मेंःए सुम्ला समुन्द्रल तेद
नो समुन्द्र सोंभानी तभा भरी भी ज़
ताके। ९फरी नो समुन्द्रलाव यास०
ल्यो भरी सोंभानी तभा भरी सिकेर।
समुन्द्रलाव जहाजर मनी सोंभानी तभा
भरी खेम्केर।

१०नकिन फरी नोनी निछींताव
चाकज्याए ओभोंकर ओतबोत नमतिन
तोबो बनै घ्योःव चाँःज्याव मेंः स्यासो
सोरो तेद रीमुलर सोनो खोलार
सोंभानी तभा भरिल परिके। ११नो
सोरोए उमिन 'अइरालु'। नो परिउ
भरिलाव री भरी बनै काव अइरालु
मिताव ज़ ओतावए नो री ओज्याव
मिँर कुधु ज़ सिकेर।

१२नकिन नो सोम्लोराए याछींताव
चाकज्याए ओभोंकर ओतबोत
निमी, स्यावै सोनो सोरोर सोंभानी
तभा भरी चुम चुमो ताकेर। है जैद
ला मनी सोंभानी तभा भरी चुम
चुमो ज़ ताके। हिताव ज़ री मनी



सोभानी तभा भरी छाम छामो ज ताके।

१३ नकिन फरी डाभाल्सिक नमत तोबो काप्यागा उभुर्ज्याव डारं:के। नो बनै चोइस अइ लिद उक्लिज्याव, “नो आ:पै यामातप्ताव सोम्लो भोंकर परमेस्वरए ओचाकज्याराए यातबोत आव मानुवाताव मिँरालाई सोखेप थैए माँतकन तारिज्या,” है उलिज्याव डाथैके।

६ नकिन नो चारताराए याछींताव चाकज्याए ओभोंकर ओतबोत नमतिन तोबो सोरो नामल ओतेव डारं:के। नो सोरोए उकुइत फरी सुन्द मुन्दौ भल्खादालाव साँचा यासिउ उलिज्याव। २ नोए नो भल्खादालाई ओफैक बनै घयो:व में:नी पुलुस्ज्याव मिकुइए सुम्ला स्यासो पुलुस्द नमत बाद निमीलाई लाम लुम कपद चुम चुमो जैक्यो। ३ नो मिकुइनी नाम भरिल स०ल०र पुलुस्केर। नोरालाई बिछी मिताव दा:न्या सक्ती यासिउ उलिज्याव। ४ नोरालाई आव मानुवाताव छीर सीर सोनो पींव भरिलाई कैज माजैद, याचाँदीत परमेस्वरए ओछाप

माल्यो मिँरालाई वाज दुख यान्या हक यासिउ उलिज्याव। ५ नोरालाई सै:न्या हक ते यासिउ ओमालिज्याव, अइज पाँच मैना पै दुख याद थलैन्या वाज उलिज्याव। नोराए याराएज्याव दुख बिछीए ओराकैकाव उहुर्ज्याव मिताव दुख ओताज्याव। ६ नो बेलाक मिँराए ‘इताव दुखर ओताज्याव देखा बुरू सिन्या ओताकिन ताखेहो’ है लिन्या लेर। खाली नोर सिन्या बेला ओमाहुवा पै सिउ दैन्या मालेर।

७ रँ:क ते नो स०ल०र लरैदा बान्या भा:सिद लिज्याव घोरा स्यासोर यालिज्याव। नोराए याडैत सुने मुकुत मिताव जासिसिउ, याडा: मिँराए याडा: मिताव उलिज्याव। ८ नोराए याचेम मेंमाराए याचेम स्यासो उलिज्याव, याहा लाराए हा स्यासो उलिज्याव। ९ नोराए याछातीत भँए पाता मिताव जासिसिउ उलिज्याव। नोराए याकरर याचलैक घोरा लरैदा गद्दी स्लेद याधों:नाज्याव मिताव गा ओथास्ज्याव। १० नोराए यार्मे: बिछीए ओर्मे: मिताव ओधास ल्यो उलिज्याव। नत ज मिँरालाई पाँच मैना पै दुख यान्या सक्ती उलिज्याव।

८:१२ यसै १३:१०; इज ३२:७; योए २:१०,३१; ३:१५ ६:२ उत १६:२८

६:३ प्रस १०:१२-१५ ६:४ इज ६:४ ६:६ अयू ३:२१; यर ८:३ ६:७ योए २:४

६:८ योए १:६ ६:६ योए २:५



११ नोराए याडैताव राजा भल्खादाल लिङ्याव चाकज्या ज़। नोए उमिन हिब्रू खामनी 'एबाद्दोन', ग्रीक खामनी 'अपोल्लियोन'।

१२ नो भोंकरए ओर्गाए ओरैव उस०कताव थैए माँतकन नो ज़ ओल्यो। फरी थैए माँतकन रैन्यानी अफ़ न्नेब्लो भोंकरनी लिङ्यानी।

१३ नकिन नो पाँच जनाराए याछींताव चाकज्याए ओभोंकर ओतबोत परमेस्वरए ओड़ाकाव सुने थानकाव चार चोंच्याकाव स्यारँःराए खार्नी तोबो गाए १४ नो भोंकर तप्ज़्यावलाई अइ ओदोङ्याव डाथैके, "नो घ्योःव यूफ्रेतिस भैलाव सुर्सिउ चार जना चाकज्यारालाई यापला·नाके," है ओदोक ते, १५ यापला·नाक्यो। नोर मिँ भरिरानी स्रोभानी तभा भरिलाई सैःन्याए जूनी नो साल, नो मैना, नो छ्याम, नो घन्ताक पै नक ज़ भाःसिसिउ यालिङ्याव। १६ नोराए घोरा चेप्न्या याफौजीर बीस करोद लिङ्यार है यालिङ्याव डाथैके।

१७ नो भजल्किद डारारँःव घोरा स्रो नो नोराए यातर्त बान्यार डारारँःक नो घोरा चेप्ज़्यावराए याछातीताव याजासिङ्याव पाता गन्धकए ओमैः स्यासो घ्याम घ्यामो स्रो नो पीं पींव

उलिङ्याव। याघोराराए याडै लाराए डै स्यासो उलिङ्याव। यायाःनी मेंः, मिकुइ स्रो नो गन्धक उपुलुस्ङ्याव। १८ नो यायाःनी पुलुसो मेंः, मिकुइ स्रो नो गन्धकनी मिँ भरिरानी स्रोभानी तभा भरिलाई याराखेम्केर। १९ नो घोराराए यासक्ती यायाःत ब उलिङ्याव, यार्मैःत ब उलिङ्याव। नोराए यार्मैःत घुलए ओडै स्यासो उलिङ्याव। ननी ज़ मिँरालाई खदम याराख्याकेर।

२० हितावत मनी नो नुल्पा नुल्मानी बाँचिउ मिँराए डादाडाव यादोङ्याव माचाव यायेन मारास्केर। नोराए दै देवताराए यासेवा दान्या ब मारास्केर। कुइए जैसिउ सुन चाँदी, पितल, सीं लुँ, आरा उरू मालिङ्याव, माथैङ्याव स्रो नो मारँःङ्याव अङ्ग्या सेवा दान्या ब मारास्केर। २१ मन्तर तन्तर दान्या, मिँर सैःन्या, कुन्या, पातज्या पातर्नी जैसिन्या ब मारास्केर।

ज़िम्ज़ा पोस्तोको रैङ्याव चाकज्या

१० नकिन तोबो बनै ओर्सा ल्यो चाकज्या बादल क्वाइसिद स्वर्गतिन उहुङ्याव डारारँःके। नोए ओडैत रिगाउँ जासिद उलिङ्याव, ओडाः निमी स्यासो उलिङ्याव, उखँर मेंःए मुल्का स्यासो उलिङ्याव।



२नोए उकुइत तोबो जिम्ज़ा पोस्तोको फैसिउ उलिज़्याव। नोए वोर्फताव उखँ समुन्द्र तर्त ओनैज़्याव, दाबज्याफताव उखँ नाम तर्त ओनैज़्याव। ३नोए लाए ओर्गा मिताव जैद बनै चोइस उक्रिक सात गोता गर्जिन्याराए मनी यार्गा सथास्द पाँकेर। ४नो गर्जिज़्यावराए यापाँ सन्यात डाथूसिक, स्वर्गतिन फरी छुत तोबो गा अइ लिद हुके, “नो सात गोता गर्जिज़्यावराए यापाँ मासर्द छाप भाःद मोंके।”

५हाःत ज़ नो तँफताव उखँ समुन्द्र तर्त, तँफताव उखँ नाम तर्त लिज़्याव चाकज्याए वोर्फताव उकुइ स्वर्गदा छींद, ६नाम नम, समुन्द्र सोनो नलाव ताव भरी जैज़्याव एकमन्या जिउँव ज़ लिज़्याव परमेस्वरए उमिन छुद अइ लिद पाँके, “अब ते धिलो तान्या माले। ७प्राइँरानी छींताव चाकज्याए ओभोंकर ओतबोत परमेस्वरए ओसेवा दोज़्याव अगमबत्कारालाई है ओरादोव मोंसिउ पाँर योःन्या ले।”

८हाःत ज़ नो डादा स्वर्गनी हुव गा फरी ब तखेप डास अइ लिद पाँके, “नँ आनी बान्केदा, नो तोबो उखँ समुन्द्र तर्त, तोबो उखँ नाम तर्त लिज़्यावए उकुइताव पोस्तोको हाइद रैके,”

है ओदाँक ते, ९डा नो चाकज्याए ल्योक बाद, “नो नकुइताव जिम्ज़ा पोस्तोको डालाई याव ताके,” है डादोक ते, “ताए, लाँकेदा, आव भरी ज्युयो। आवए नफूलाई सकादचान्या ले, नयाःलाई ते राप मिताव सत्ता-दचान्या ले,” है ओदाँव प्राइँना, १०उकुइताव जिम्ज़ा पोस्तोको रैद डाज्युक डायाःत राप मिताव ता ता ताके। डागालो छींनी डाफू बनै काके।

११हाःत ज़ फरी तोबो गा अइ लिद ओपाँज्याव डाथैके, “नँ फरी ब प्राइँ राज्यालावर, प्राइँ जातलावर, प्राइँ खामनी पाँज्यावर सोनो राजाराए याक्याँत हुन्या पाँर पाँव परिरिज़्या।”

परमेस्वरए नेबरें ओसाचीनी

११ हाःत ज़ डालाई तोबो भाता स्यासो गोइँन्या ताङ्गा याँकेर। नकिन तोबोए है दाँक्यो, “नँ आनी बाद परमेस्वरए ओध्यान फ़िम ओथानस ज़ गोइँयो। नल हुज़्याव ओसेवा दोज़्यावरालाई मनी यागनियो। २नो ध्यान फ़िमलाई नगोइँक, पाखाताव मैरा भरी रास्यो। नो भरी परमेस्वरकिन तँदाडावरालाई यासिउ लिज़्या। नोराए परमेस्वरए



उमिनताव सहरलाई बयालीस मैना भरी याखँए छिल्ल्या लेर। ३नो बेलाक ज़ नेब्लो डासाचीनिलाई बाह्र सय साथी दिन भरी बर्ला क्वा क्वाइसिद परमेस्वरए ओपाँ सथैन्या हक यान्या डाले।”

४नो नेब्लो साचीनी नेब्लो जैतून सीनी ज़। नो नाम नमलाव परमेस्वरए ओङ्काक नेब्लो दिउ बाल्ल्यानी मनी नोनी ज़। ५सुवाराए नोनिलाई कैवार जैव यापैकिन नोनी नियाःनी मेंः पुलुस्द नोरालाई चुयाप ख्यान्या लिनी। फरी नोनिलाई कितावनी सैःव यापैज्याव, या मनी हितावनी ज़ सिरिज्यार। ६नोनी परमेस्वरए ओपाँर निरासथैव बेलाक पै, नम घमावाक लिद नम सूइन्या, रीरालाई भी पल्लैन्या सोनो निपैज्याव मिताव मानुवात नुल्पा नुल्मा रैन्या सक्तीर ब नोनी निकुइत ज़ तान्या ले।

७नोनी साची यान्या नियेन ओखेमोत भल्लखादानी तोबो बनै छे छे डम्सिउ जन्तु पुलुस्द नोनिलाई खप्द हारैद निसैःरिज्याव। ८नोनी निमोरोर यरूसलेम सहरलाव दोहाक अइज्ज ख्यासिउनी तान्या लिनी। नो सहरल ज़ निप्रभुलाई मनी क्रुसत तङ्गैद

यासैःव। है जैद नो सहरए उमिन सदोम है दादी ब ताके, इजिप है दादी ब ताके। ९नोनी निमोरोलाई आधास चार दिन पै खादरल माभाःद पाखाक ज़ यारानैज्याव। प्राइँ राज्यालावर, प्राइँ जातलावर, प्राइँ थोलावर सोनो प्राइँ खामनी पाँज्याव मिँराए नो मोरोनिलाई रँःद, १०बनै खुसी ताद यारेंतए याकुइताव सरेसर ब या याल भाःसिन्या लेर। नो नेब्लो अगमबक्तानी मानुवात निलिक मिँरालाई यापापत उथुपुल निराजैवए निसिउत बनै रेंकेर।

११नोनी निसिउ आधास चार दिन ओतावत परमेस्वरए ल्योनी बाँचैन्या स० फरी निक्क्याँत हुद नोनी सोद च्याँःसिकिनी। निताव रँःद नो रँःज्यावर याछ्याचेए बनै भुम भुम गूकेर। १२हाःत ज़ नोनी स्वर्गनी ‘आदा हुचिन्के’ है लिन्या गा तोबो थैद बादल जील स्वर्गदा बाकिनी। नोनी निबाज्याव निसुतुर भरिराए ब यारारँःकेर। १३हाःत ज़ बनै घ्योःव भोंचालो हुद सहरलाव भिम भरी दस भानी तभा भरी धलिकेर। मिँर मनी सात हजार सिकेर। उपुर्कावर बनै छेःद स्वर्गताव परमेस्वरए उमिन बनै

११:४ जक ४:३,११-१४ ११:६ १ राज १७:१; प्रस ७:१७-१९; १ समू ४:८

११:७ दान ७:७,२१ ११:८ यसै १:९-१० ११:११ इज ३७:१० ११:१२ २ राज २:११



सद्योःदिकेर। १४ दोस्रो थैए माँतकन
नो ज्ञ ओल्यो। अफ़ थैए माँतकन रैन्या
तोबो लिज़्या। नो हतप्त ज्ञ हरिज़्या।

प्राइरानी छींताव भोंकर

१५ हाःत ज्ञ प्राइरानी छींताव
चाकज्याए ओभोंकर ओतबोत स्वर्ग-
तिन बनै घ्योःव घ्योःव गार अइ लिद
थास्केर,

“आव मानुवाताव राज्यार
गेपरमेस्वर सोनो ओखतैव
ख्रीसनी निराज्या ज्ञ ताद ले।

नोए नो राज्यालाई एकमन्या
ओल ज्ञ चलैन्या ले।”

१६ हाःत ज्ञ नो परमेस्वरए ओड़ाकाव
सु सु यासिंहासनत चुसिज़्याव चौबीस
जना स्मेरर परमेस्वरए ओड़ाक
फुलुप्सिद धो दाद, १७ अइ लिद पाँकेर,

“अ परमप्रभु, भाःकिन लिज़्याव,
छींङ पै लिज़्याव
बनै नसक्ती ल्यो गेपरमेस्वर,
नँलाई धन्याबाद गेचरैःनिज़्या।
बनै घ्योःव सक्ती नकुइत रैद,
नराज्या चलैन्यात नथूसिके।

१८ प्राइँ जातलाव मिँर ड़ादाकिन
नँलाई रँःद यारिस चोद
बनै यामचिज़्याव।

अब ते नोराए ड़ैत नरिस
थुदचान्या बेला हुके,
सिधुवरालाई नराफाल्रिज़्याव
बेला ब हुके।

फरी छैँव नमीरालाई,
नसेवा दोज़्याव अगमबक्त्तार,
नमान नैदचाज़्यावर,
घेप्पा ज़िमज़ारालाई इनाम
नराएरिज़्याव बेला ब हुके।

हाःत ज्ञ आव मानुवा
बलेःज़्यावरालाई यामिन
समैदचान्या नले।”

१९ हाःत ज्ञ स्वर्गताव परमेस्वर उलि-
ज़्याव ध्यान फ़िम फैसिद नो बाचा
नैसिउ मुधुस ब रँःके। नो ध्यान फ़िमनी
म्याल्याकनी मिलिक ताद गर्जिन्या गार
पुलुस्केर। नाम ब थोनोःसिद घ्योःव
घ्योःव तिसरै ब तेके।

मेंमा सोनो अजिङ्गर

१२ हाःत ज्ञ नमत तोबो बनै
अचम्बलाव सरेस रँःके।
नत तोबो मेंमा निमी स्यासो फ़ार
फ़ारो क्वाइसिसिउ, उखँ धूँल स्यावै,
ओड़ैत बाह् गोता सोरोए मुकुत
जासिसिउ उलिज़्याव। २नो मेंमा ज़ा
दैन्या ताद बनै घर्लिद ओघज़्याव।



३नकिन फरी ब नमत तोबो सरेस रैं:के। नत तोबो बनै घ्यो:व घ्यामो अजिङ्गर पुलुस्द उलिङ्ग्याव। नोए ओडैर सात गोता, उरँ:र दस गोता यालिङ्ग्याव। सात गोता ओडैत मुकुत जासिसिउ उलिङ्ग्याव। ४नोए ओर्मै:ए नमताव सोरोर स्रोंभानी तभा भरी स्लेद नामल याख्याक्यो। नो अजिङ्गर फरी, “नो ज़ा दैन्या घर्लिङ्ग्याव मेंमाए ज़ा ओदैवत डाकैया,” लिद ओङ्गाक वैसिद उलिङ्ग्याव।

५नो मेंमाए खेपा ज़ा दैक्यो। नो ज़ प्राइँ राज्यालाव मिँरालाई उकुइत भँए भुइ रैद राज्या चलैहुरिङ्ग्याव मिँ। नोलाई परमेस्वरए स्वर्गताव ओपोल ज़ छींद लाँक्यो। ६नो मेंमा फरी परमेस्वरए मोंसिन्या पो जैद ओयोए धों:द बनड मोंसिनाके। नड ज़ बाह सय साथी दिन डासिके।

७हा:त ज़ स्वर्गत घ्यो:व लरैं ताके। मिखाएल[†] ओचाकज्यारास नो अजिङ्गरस लरिनाकेर। नो अजिङ्गर मनी ओचाकज्यार रैद मिखाएलस लरिद, ८यार्सार खेम्द स्वर्गताव यालिन्या पोनी हारिद पुलुस्केर। ९नो अजिङ्गर स्वर्गतिन नामल ख्यासिके। नो

दियाबलस यादोज्याव भा:किनकाव घुल, मानुवाताव मिँरालाई भुकैङ्ग्याव सैतान ज़। नो मेल ओख्यासिक ओचाकज्या भरी ब ओलस ज़ तेकेर।

१०फरी स्वर्गत तोबो बनै घ्यो:व गा अइ लिद ओपाँज्याव डाथैके,

“अब ते गोपरमेस्वर प्राइँनी भें:स्या ताद, ओसक्तीरास ओराज्या ब तयार जैद नैव।

नो राज्या चलैन्या हक

ओज़ा येसु ख्रीसए

ओल उकुइत ज़ रैद नैव।

अब ते गोदाज्यु भाइरालाई लाकनी

रील परमेस्वरए ओङ्गाक

छचाप लैङ्ग्याव सैतान

स्वर्गतिन नामल ख्यासिके।

११ परमेस्वरए उमिनतावर ते

नो पाथाए उभीनी

परमेस्वरस खैवर यातावए,

सोनो याजिउए मया मादाद

परमेस्वरए ओपाँत साची

यान्यात जात ज़ यामारासोए,

सैतानलाई हारैद

याज़ भें:स्या ताकेर।

१२ है जैद जे स्वर्गत लिङ्ग्यावर प्राइँ रेंचिके।

† १२:७ यहू १:६ चिऊन्या।

१२:३ दान ७:७ १२:४ दान ८:१० १२:५ यसै ६६:७; भज २:६

१२:७ दान १०:१३, २१; १२:१ १२:६ उत ३:१ १२:१० अयू १:६-११; जक ३:१



जे मानुवात सोनो समुन्द्रल
लिङ्यावरालाई ते
थैए माँतकन ज़ लिङ्या।

काराव ल्यो ताकिन सैतान
जेल्योल ख्यासिद, 'डाबेला
छ्या ज़ लिङ्या' लिद
बनै ज़ रसिद ले।”

१३नो अजिङ्गर नामल ओख्यासिउत
नो खेपा ज़ा दैव मेंमाए उखिरी
पसिनाके। १४हाःत ज़ नो अजिङ्गर
ओङाकिन भुर्द बनडाव उलिन्या पो
जैसिउड केस्न्याए जूनी नो मेंमालाई
घेप्पा काप्च्यागाए ओकर नेब्लो
यासिउ उलिङ्याव। नो बनल आधास
चार बर्स डासिके। १५नो अजिङ्गर
फरी नो मेंमालाई रीए गबगैवक लिद
ओयाःनी बनै घ्योःव भल ख्यादिक्यो।
१६नामए नो मेंमालाई सघैन्याए जूनी
नो अजिङ्गर ओयाःनिकाव री भरी
नाम फैसिद होल ज़ सक्काल्दिक्यो।
१७निताव रँःद नो अजिङ्गर नो मेंमास
भन ज़ उरिस चोद ओज़ा भरिरास ज़
लरें दोनाक्यो। नोए ओज़ार परमेस्वरए
ओपाँर दाद येसुए ओसाचीत
लिङ्यावर ज़।

१८हो बेलाक नो अजिङ्गर समुन्द्र
छ्योकाव बालुवाल च्याँःसिद
उलिङ्याव।

अजिङ्गर ल्योनी हक दैव
राछ्यास

१३ हाःत ज़ समुन्द्रनी तोबो बनै
छे छे डम्सिउ राछ्यास
मिताव पुलुस्द उहुङ्याव डारँःके। नोए
उरँःर दस गोता, ओडैर सात गोता
यालिङ्याव। दस गोता उरँःत तोबो
तोबो मुकुत जासिसिउ उलिङ्याव।
सात गोता ओडैत फरी तोबो तोबो
परमेस्वरकिन स०द युँ माजामो मिनर
सर्सिउ उलिङ्याव। २नो डारँःव
राछ्यास च्याँकुला स्यासो उलिङ्याव,
उखँर निमए उखँ स्यासो उलिङ्याव,
ओयाः घ्योःव लाए ओयाः स्यासो
उलिङ्याव। नोए ओसक्ती, ओराज्या,
ओहक भरी नो अजिङ्गर ल्योनी दैद
ओनैङ्याव। ३नोए ओडै भरिनी तोबो
ओडैत सिवा जप जैद पल्सिउ घाइनी
गराँव मिताव ज़ डारँःके।

मानुवाताव मिँ भरिए नोलाई रँःद
अचम्ब ताद उछीं उछीं ज़ याबाङ्याव।
४नोए उछींत बाङ्यावराए, “आव
राछ्यासए ओहक भरी अजिङ्गर
ल्योनी ज़ उहुव ओल्यो,” लिन्या सैंद,
नो अजिङ्गर ओसेवा दोकेर, सोनो,
“आव राछ्यासकिन घेप्पा सु ची
उलिङ्याव? आवस लरें दाधुन्या ब



सु ची उलिङ्ग्याव?" लिद नोए ओसेवा मनी दोकेर। ५नो राछ्यासलाई फरी परमेस्वरकिन स०द परमेस्वरस या: दान्या, सोनो ओमन लागिउ येन दान्या बयालीस मैना पै हक यासिउ उलिङ्ग्याव। ६है जैद ज़ नोए परमेस्वरए उउपत माचाहिउ पाँर भा:द, उमिनर बले-दद्याद, परमेस्वर उलिङ्ग्याव पो सोनो स्वर्गताव परमेस्वरए उमीराए याडैत ब माचाहिउ पाँर भा:द पाँके। ७नोलाई परमेस्वरए छैव उमीरास लरै दाद नोरालाई हारैधुन्या हक यासिउ उलिङ्ग्याव। नोए ओहक भरी प्राइँ राज्यालावर, प्राइँ जातलावर, प्राइँ थोलावर, प्राइँ खामनिकाव पाँङ्ग्यावराए याडैताव ज़ ओल्यो। ८है जैद आव नाम नम ओमातादकिनकाव अजम्बरी जुनीलाव पोस्तोकोल यामिन माल्यो भरिए नोए ओसेवा दान्या लेर। नो पोस्तोको सै:सिउ पाथाए उकुइत लिङ्ग्या।

६है जैद जोए थैन्या उयुँ लिङ्ग्या, नोए चावस ओथैवक।

१० हो बेलाक जोलाई

भ्यालखानाल बान्या जैसिउ लिङ्ग्या, हो भ्यालखानाल ज़ बान्या ले।

जोलाई तरवालीए सै:न्या जैसिउ लिङ्ग्या, हो तरवालीनी ज़ सिन्या ले।
आनी ज़ परमेस्वरए छैव उमीर थ०रिद युँ हबो ताव परिके।

छीनीकाव राछ्यास

११नकिन फरी ब नाम जीनी पुलुसो छुत तोबो राछ्यास डारै:के। नोए उरै: पाथाए उरै: स्यासो नेब्लो उलिङ्ग्याव, ओर्गा अजिङ्गरए ओर्गा स्यासो उलिङ्ग्याव। १२नोए नो ड़ादाडाव राछ्यासए ओहक भरी ओचलैङ्ग्याव, आव मानुवाताव मिँ-रालाई नो ड़ादा ओडै पल्सिउ घाइ गराँव स्यासो राछ्यासए ओसेवा दाव ओरापरीङ्ग्याव। १३नोए अचम्बलाव सरेसर जैद नमतिन मानुवात में: मुल्कार ब मिँराए याडाक सतेद ओराएङ्ग्याव। १४नोए नो ड़ादाडाव राछ्यासए ल्योनिकाव ओरैव हकरानी अचम्बलाव सरेसर जैद आव मानुवाताव मिँरालाई भुकैद नो ड़ादा ओडै तरवालीए पल्सिउ गराँव राछ्यासए अङ्ग्या तोबो जैव यापरीक्यो। १५नोए नो अङ्ग्यालाई उस० भा:दद्यान्या सक्तीर दैद नोलाई



पाँधुन्या जैक्यो। हाःकिन नो अडग्याए ओसेवा दाव माभैःज्याव भरिरालाई सैःव यापरीक्यो। १६नकिन नोए मिँ भरिरालाई घेप्पा ज़िम्ज़ा, धनीर गरीबर, बाँदा माबाँदार प्राइँलाई ज़ वोर्फताव याकुइत तादी ब, याचाँदीत तादी ब, तोबो सरेस भाःव यापरीक्यो। १७नो सरेसत नो राछ्यासए उमिन कितर ओनमर भाःसिउ उलिज़्याव। नो सरेस माल्योराए सुए ज़ काता ज़ लँःव यामादैज़्याव, काता ज़ योःव ब यामादैज़्याव।

१८आव बुकिन्याए जूनी गहक चाहिज़्या। जोए ओगहक लिज़्या, होए नो राछ्यासए ओनमर ओसैँवक। नो नमरए तोबो मिँए उमिन सतैँज्याव। नोए ओनमर छ सय छयसथी ज़।

पाथा स़ोनो याखत माल्यो मिँर

१४ हाःत ज़ फरी तखेप डाभाल्सिक परमेस्वरए ओपाथा स्वर्गताव सियोन दाँदात च्याँःसिद उलिज़्याव डारँःके। नोस याचाँदीत ओल उमिन स़ोनो ओबाबुए उमिन सर्सिउ तलाख चवालीस हजार मिँर यालिज़्याव। २हाःत ज़ स्वर्गतिन बनै घ्योःव रीए ओर्गा स़ोनो नम गर्जिज़्याव मिताव गा उहुज़्याव

डाथैके। नो डाथैव गा मिँराए सारङ्ग यातपज़्याव मिताव ज़ ओथास्ज़्याव। ३नोराए परमेस्वरए उसिंहासन ड़ाक, चारता जन्तु मितावराए याड़ाक स़ोनो चौबीस जना सेरराए याड़ाक साःरो गित तोबो यागैज़्याव। नो गित सैँज्यावर परमेस्वरए आव मानुवानी फुर्सुल ओराजैव तलाख चवालीस हजार उमीराकिन सुए ज़ यामासैँज्याव। ४नोर पातज्या पातर्नी माजैसिउ बनै छैँवर परमेस्वरए ओपाथाए उछीं उछीं बाज़्यावर ज़। नोर आव मानुवाताव मिँ भरिरानी लँःसिउ, परमेस्वर स़ोनो ओपाथानी निजूनी उस०कताव उथैसिउर ज़। ५आवराए यायाःत धुत पाँ ब काता ज़ माहुइ, कान्त ज़ याखत माल्योर लिज़्यार।

सोंबरें ओचाकज्यार याकिउ

६हाःत ज़ फरी ब तोबो चाकज्यालाई नमत उभुज़्याव डारँःके। नोलाई आव मानुवाताव प्राइँ राज्यालावर, प्राइँ जातलावर, प्राइँ थोलावर, प्राइँ खामनी पाँज़्याव मिँरालाई खर्क ज़ माखेम्न्या चाव था सथैन्त्या यासिउ उलिज़्याव। ७नो बनै चोइस अइ लिद किके, “परमेस्वरलाई रँःद छेःद



ओमान नैदिचिके, मिँ भरिरालाई ओराफाल्रिज्याव छचाम हुद ले। है जैद नाम नम स्रोनो समुन्द्र रीमुलर जैज्यावए ओड़ाक फुलुप्सिद ओसेवा दोचिके।”

८हाःत ज़ फरी नोए उछीं उछीं छुत तोबो चाकज्या हुद अइ लिके, “खदम ताके! नो बनै उमिन थासो बेबिलोन सहर खदम ज़ ताके। नोए प्राइँ जातलाव मिँरालाई ओदोज्याव पातर्नी येननी समँःद याफसङ्गैक्यो।”

९नकिन फरी नो नेब्लो चाकज्यानी निछीं निछीं छुत तोबो चाकज्या हुद अइ लिद किके, “सुवाराए नो राछचास स्रोनो नोए उसुरूप जैसिउ अङ्ग्यानी निसेवा दाद राछचासए ओछाप याकुइत तादी ब, याचाँदीत तादी ब, याभाःकिनी, १०नोरालाई मनी परमेस्वरए उरिसलाव मासचिरिसिउ चर्कासो दाखमदच मिताव उखुरीनी सवैन्या ले। नोर पाथाए ओड़ाक स्रोनो परमेस्वरए छैव ओचाकज्याराए याड़ाक गन्धक स्रोनो मेंःल मासहिसिधुन्या दुख दैन्या लेर। ११नलाव दुख याज्याव मिकुइ खर्क ज़ खेमन्या माले। जोराए नो राछचास स्रोनो उसुरूप जैसिउ अङ्ग्यानी

निसेवा दाद राछचासए उमिनताव छाप रैज्यार होराए लाकनी रील खर्क ज़ सन्च दैन्या मालेर। १२परमेस्वरए ओपाँर भैःद येसुलाई यारुँ हुज्याव छैव उमीर आव पाँत थोरिद ल्यो परिके।”

१३हाःत ज़ फरी स्वर्गनी तोबो गाए अइ उलिज्याव डाथैके, “आव सर्के, आकिनी प्रभुए उमिनत सिज्यावर असिक दैवर तान्या लेर।” छैव पुरूसए ब, “हैज, नोर यायेननी यार्सा नैन्या लेर, याजेला ब याछींत ज़ हुन्या ले।”

मानुवाताव बाली सिमन्या बेला

१४हाःत ज़ फरी तोबो बनै पाल पालो बादल तर्त मिँ मिन्सिउ मिताव चुसिद उलिज्याव डारँःके। नोए ओडैत सुने मुकुत जासिउ, उकुइत बनै छाव राँकासी क्योःद ओनैज्याव। १५फरी स्वर्गताव ध्यान फिमनी परमेस्वरए ओचाकज्या तोबो पुलुस्द नो बादलत चुसिद लिज्यावलाई बनै चोइस क्रिद अइ दोक्यो, “मानुवाताव नबाली मीःद सिमन्या बेला ओतावए नराँकासी हाइद एन्के।” १६नकिन नो बादलत चुसिद लिज्यावए मानुवा तर्त

१४ः८ यसै २१ः६; यर ५१ः८ १४ः१० यसै ५१ः१७; उत १६ः२४; इज ३८ः२२

१४ः११ यसै ३४ः१० १४ः१४ दान ७ः१३ १४ः१५ योए ३ः१३



ओराँकासी चलैद मानुवाताव बाली एन्क्यो।

१७नकिन फरी छुत तोबो चाकज्या स्वर्गताव ध्यान फिमनी पुलुस्के। नोए उकुइत मनी तोबो बनै छाव राँकासी उलिज्याव। १८नकिन फरी ब मेंःए मुल्का डैताव तोबो चाकज्या थाननी हुद नो उकुइताव छाव राँकासी ल्यो चाकज्यालाई बनै चोइस क्रिद अइ दोक्यो, “मानुवाताव जोम्परसैर मींःद लेर। छाव नराँकासी चलैद ओजोम्पा भरी सतेद यासिम्के,” है ओदोक ते, १९नो चाकज्याए मानुवात ओराँकासी चलैद जोम्पा भरी सतेद सिमद परमेस्वरए उरिसलाव पीन्या ओकोलोल याख्याक्यो। २०नो जोम्परसैर सहरकिन पाखाड यापीक भी बनै पुलुस्द स्रोसय किलोमितर भरिवाल घोरा गदैन्यावाकाव भल बाके।

याकुइत नुल्पा नुल्मा ल्यो
चाकज्यार


१५ फरी डाभाल्सिक नमत तोबो बनै अचम्बलाव सरेस डारँःके। याकुइत नुल्पा नुल्मा ल्यो सात जना चाकज्यार डारारँःके। आवर ज़ प्राइँरानी छींताव नुल्पा

नुल्मार, परमेस्वरए उरिस नत ज़ खेमन्या ले।

२नकिन तोबो मेंःस बरेःसिउ धर्पन स्यासो बनै घ्योःव समुन्द्र मिताव डारँःके। नोए ओतर्त परमेस्वरए नोरालाई ओरायो सारङ्गर याकुइत ल्योर कुधु ज़ च्याँःसिद यालिज्याव ब डारारँःके। नो च्याँःसिद लिज्यावर नो डादाडाव राछ्यास सोनो नोए उसुरूप जैसिउ अङ्ग्याए ओछाप मारैवर, ओलकिन भेंःस्या तावर ज़। ३नोराए परमेस्वरए ओनोकोर मोसा सोनो परमेस्वरए ओपाथाए ओभजन अइ लिद यागैज्याव,

“अ परमप्रभु,
बनै नसक्ती ल्यो गेपरमेस्वर,
नँ नयेन भरी बनै घ्योःव सोनो
अचम्बलाव ज़ लिज्या।
नँ प्राइँ जातलावराए याराजा,
नदोज्याव भरी ब बनै सतलाव
साचो वाज़ लिज्या।

४ है जैद अ प्रभु, नँलाई रँःद
माछेःन्या सु ची उलिज्याव?
नमिन सघ्योःद मायान्या ब
सु ची उलिज्याव?
नँ वाज़ सतलाव छैँव नलिज्या।
प्राइँ जातलाव मिँर नखँत
फुलुप्सिद धो दान्या लेर।



(१६:१)

न्यायस नदोज्याव येन भरी
छर्लङ्ग ज़रैःद ले।”

५ आव भरी ओतावत फरी ब
डाभाल्सिक स्वर्गताव ध्यान भिम
फैसिद परमेस्वर उलिङ्ग्याव प्राइरानी
चोखो पो डारैःके। ६ हाःत ज़ नो
डादाडाव याकुइत नुल्पा नुल्मा ल्यो
सात जना चाकज्यार ध्यान भिमनी
पुलुसहुकेर। नोर बनै तक तकौ
क्वा जासिउर, याछातीत सुने पाता
पो-सिउर यालिङ्ग्याव। ७ नकिन नो
चारता जन्तु स्यासोरानी तोबोए नो
सात जना चाकज्यारालाई एकतार
जींदो ज़ लिङ्ग्याव परमेस्वरए उरिस
सब्याल्लिसउ सात गोता सुने खुरी
याएक्यो। ८ हाःत ज़ नो स्वर्गताव
ध्यान भिम भरिल परमेस्वरए

ओज़गै सोनो ओसक्तीनिकाव
मिकुइए सब्याल्लक्यो। नो सात जना
चाकज्याराए याकुइताव नुल्पा नुल्मा
ओमाखेमा पै नो ध्यान भिमल सु ज़
मापसिधुकेर।

परमेस्वरए उरिसलाव सात गोता
खुरीर

१६ नो सात जना चाकज्यारालाई
ध्यान भिमनी तोबो गाए अइ
ओरादोज्याव डाथैके, “जे बाचिकेदा,
नो परमेस्वरए उरिसलाव सात गोता
खुरीर मानुवात याराथुचिके,” है
ओरादोक ते, २ उस०कतावए उखुरी
मानुवात उथुव प्राइंना नो राछ्यासए
ओछाप रैवर सोनो नोए उसुरूप
जैसिउ अङ्ग्यालाई धो दाङ्ग्याव

१५:४ यर १०:७; भज ८६:६ १५:५ प्रस ३८:२१

१५:८ प्रस ४०:३४; १ राज ८:१०-११; २ इति ५:१३-१४; यसै ६:४

मिँ भरिराए याक्याँत धो सहिउ युँ
माजामो घाइर ताकेर।

३नकिन फरी होए उछींताव
चाकज्याए उखुरी समुन्द्र तर्त उथुव
प्राइँना सिउ मिँए उभी स्यासो ताद
समुन्द्रलाव ताज्याव भरी ओपो-स ज़
सिकेर।

४नकिन फरी नोनी निछींताव
चाकज्याए उखुरी रीमुल जीदा, भै
जीदा उथुक नलाव री भरी भी ज़
ताके। ५नै ओताव प्राइँना रीराए डैताव
चाकज्याए अइ लिद ओपाँज्याव
डाथैके,

“अ सतलाव छैव प्रभु,
डादाकिन ब लिज्याव,
एकन्या ब लिज्याव,
आव नरायो सजा
न्यायस ज़ नदोके।

६आव सजा दैवराए भाःकिन ज़
नअगमबक्तारालाई,
छैव नमींरालाई
याभी सोभोदचाद
सैःव ज़ यारानैज्याव।

अब ते नोरालाई भी ज़
नरासवैके।

नोर नो दैन्याकावर ज़ याल्यो।”

७हाःत ज़ नो थाननी मनी तोबो गा
अइ लिद हुके,

“हैज परमप्रभु बनै नसक्ती ल्यो
गेपरमेस्वर,
आव नफालो भरी

साचो न्यायस ज़ नफाल्के।”

८नकिन नो सोम्लोराए याछींताव
चाकज्याए उखुरी निमी तर्त उथुक
घामए मिंरालाई हिण्या जैद ओरायोए,
९नोरालाई ग्रेप ग्रेप रावए यासघाक्यो।
हितावत मनी नोराए यायुँ माफकैर,
परमेस्वरए ओमान ब नैद माएकेर,
भन नो नुल्पा नुल्मा जैन्या ओहक
लिज्याव परमेस्वरलाई उमिन हाइद
थलो ज़ नैकेर।

१०नकिन नो चारताराए याछींताव
चाकज्याए उखुरी नो राछचासए
उसिंहासनत उथुक ओराज्या भरी
चुम चुमो ज़ ताके। नलाव लिज्याव
भरिराए यादुखए यासे कज्याप
कैकेर। ११नोराए मनी यायुँलाई
माफकैकेर, बुरू यायेनलाई ब
मारास्द नो याघाइरानी यादैव दुखए
भन स्वर्गताव परमेस्वरलाई थलो ज़
नैकेर।

१२नकिन नो पाँच जनाराए
याछींताव चाकज्याए उखुरी घ्योःव
यूफ्रेतिस भैल उथुक नलाव री
भरी ओपो-स ज़ सा-के। नो बगरल
पुर्बनी हरिज्याव राजाराए यायेम ब

तयार ताके। १३हाःत ज़ नो अजिङ्गरए ओयाःनी तोबो, राछ्यासए ओयाःनी तोबो, नोए ओपाँ सथैङ्ग्याव ओनैए ओयाःनी तोबो, नोर स्रोम्लोए यायाःनी ज़ बोकोरो स्यासो माचाव पुरूसर पुलुस्केर। १४नोर अचम्बलाव सरेसर सतैङ्ग्याव माचाव पुरूसर ज़। नोर आव मानुवाताव राजा भरिरालाई बनै ओसक्ती ल्यो परमेस्वरए जैद ओरायो खेमन्या छ्यामकाव लरैए उजूनी दुप्नाङ्ग्यावर ज़।

१५“है जैद जे सैसिद लिच्यो। डा कुना हुङ्ग्याव मिँ मिताव सुए ज़ यामासैद डाहुरिङ्ग्या। जो सैसिद भाःसिद लिङ्ग्या, हो ओक्वार सामा दाद ओनैकिन नाङ्ग्या ताद लाज मोर्नो माताद धन्याकाव ज़ लिङ्ग्या।”

१६नकिन नो बोकोरो स्यासो पुरूसरए मानुवाताव राजा भरिरालाई हिबू खामनी तोबो आर-मागेदोन यादोङ्ग्याव पोल यारादुप्केर।

१७नकिन नो सात जना चाकज्यारानी प्राइरानी छींताव चाकज्याए उखुरी बतासत उथुक स्वर्गताव ध्यान भिमलाव सिंहासनतिन तोबो गा, “अब ते खेम्के,” है लिद हुके। १८हाःत ज़ म्याल्याकनी मिलिक ताद

नमर गर्जिद नामर ब थोनो-सिके। नो भोंचालो बनै घ्योःव ओतावए आव मानुवात मिँर यातावकिन खर्क ज़ नाःल्दिउ ओमाहुताव। १९नो भोंचालोनी आव मानुवाताव बनै उमिन थासो सहर स्रोभा ताद प्राइँ राज्यालाव सहरर धलिकेर। है जैद नो उमिन थासो बेबिलोन सहरलाई उजूं यान्या मामेःद परमेस्वरए उरिस सब्याल्सिउ खुरीनी दाखमदच सवैक्यो। २०समुन्द्र खालाव तापु भरी ब ओपो-स ज़ गदिकेर, हाँर ब आदा बाकेर लिन्या ज़ माताके। २१तिसरैर ब बनै घ्योःव घ्योःव तुगुर दँकावर नमतिन मिँराए यातर्त तेकेर। नो तिसरैनिकाव नुल बनै माचाव ओतावए मिँराए परमेस्वरए उमिन हाइद बनै ज़ थल्केर।

बेबिलोन मेंमा स्रोनी राछ्यास

१७ हाःत ज़ नो याकुइत खुरी ल्यो सात जना चाकज्यारानी तोबोए डालाई है दाँक्यो, “आत हुन्के, डा नँलाई रीराए तर्त चुसिद लिङ्ग्याव पातर्नी मेंमाए ओदैरिङ्ग्याव सजा सतैद डाईरिङ्ग्या। २नोस आव मानुवाताव राजा भरिराए पातज्या जैसिद, याधूलाव मिँ भरिए ब नोस

निताव यादोव येनए मँःव मितावर ताद बनै महकिकेर।”

३हाःत ज़ परमेस्वरए उपुरूसए डालाई भजलकैद नो चाकज्याए डालाई तोबो बनल ओलाँनाव मिताव ताके। नड नो मेंमालाई घ्यामो राछ्यासए ओतर्त चुसिद उलिज़्याव डारँःके। नो राछ्यासए ओडै सात गोता, उरँः दस गोता उलिज़्याव। ओक्याँ भरी परमेस्वरकिन स०द युँ माजामो मिनर सर्सिउ उलिज़्याव। ४नो मेंमा फरी घ्यामो स्रोनो पींव क्वा क्वाइसिउ उलिज़्याव। ओक्याँ भरी सुन चाँदी, हिरामुतीए भलैसिउ उलिज़्याव। उकुइत फरी सुने खुरील ओदोव युँ माजामो येनर, ओदोव असतर नल सब्याल्सिउ उलिज़्याव। ५नोए ओचाँदीत तोबो बिन्ज़ा बिन मिताव मिन सर्सिउ उलिज़्याव। नो सर्सिउ आव ज़, “माहान बेबिलोन, मानुवाताव पातनीर स्रोनो युँ माजामो पाँराए याआमा ज़।” ६नो मेंमालाई परमेस्वरए छैँव उमींराए याभी स्रोनो येसुए ओसाची याज़्यावराए याभीए मँःद उलिज़्याव डारँःके। है जैद नोलाई रँःद अचम्ब ज़ डाताके।

७हाःत ज़ नो चाकज्याए डालाई, “नँ काराव अचम्ब ताद नलिज़्याव?

नो मेंमाए ओअर्थ स्रोनो नोलाई घुर्द नैज़्याव ओडै सात गोता उरँः दस गोता ल्यो राछ्यासए ओअर्थ ब पलास्द डारँःरिज़्या। ८नो नरँःव राछ्यास ड़ादा ते ओल्यो, आख ते माले। हैदी ब नो सुन्द मुन्दौ भलखादानी तखेप पुलुस्द हाःकिन नासदा ज़ बान्या ले। है जैद आव नाम नम ओमाताद-किनकाव अजम्बरी जुनील बान्या पोस्तोकोल यामिन माल्यो भरी नो तखेप सिद जनो राछ्यासलाई रँःद अचम्ब ज़ तान्या लेर।

९“आवए ओअर्थ भरी यागहक ल्योराए उतीरक। नो राछ्यासए सात गोता ओडैए ओअर्थ नो मेंमा चुसिद उलिज़्याव सात गोता पोक्यार ज़। १०नोर सात राजार ज़। नो सात राजारानी पाँच राजार खदम ताधुकेर, तोबो आज्यालकाव लिज़्याव ज़, तोबो आःपै माहुताए। नो उहुवत जाँवा पै वाज़ लिरिज़्या। ११नो ड़ादा ल्यो छींनी सिउ राछ्यास मनी नो सात राजारासकावनी तोबो ओल्यो। नो फरी उहुवत नो सात राजात चाःसिद आथौँ राजा ब तारिज़्या। हाःत ज़ नो ब नास तारिज़्या।

१२“फरी नो नरँःव राछ्यासए दस गोता उरँःर दस राजार ज़। नोराए

आःपै याराज्या मादैतार। हितावत ब नोर नो राछ्यासस तघन्ताए उजूनी राज्या चलैन्या हक दैन्या लेर। १३नोर प्राइँए यायुँ तोबो युँ ज़ लिज़्या। है जैद नोराए यासक्तीर याहकर प्राइँए नो राछ्यासए उकुइत ज़ सूँपिन्या लेर। १४नोराए परमेस्वरए ओपाथास लरै दान्या लेर। निताव यादोवत नो पाथा प्रभुराए याप्रभु, राजाराए याराजा ओल ज़ ओतावए नोरालाई हारैन्या ले। ओलसकाव लिज़्याव भरी ओल ओराछाँतिउर, ओराखुलोर स़ोनो ओसतत लिज़्यावर ज़।”

१५नकिन नो चाकज्याए फरी ब है दाँक्यो, “नो पातर्नी मेंमा चुसिद उलिज़्याव नरँःव रीर प्राइँ राज्यालावर, प्राइँ जातलावर, प्राइँ खामनी पाँज्याव माहोल्या मिँर ज़। १६नो नरँःव दस गोता राजार फरी नो राछ्यासस खैद नो पातर्नी मेंमालाई सोद भोरोःसिद नाङ्ग्या पात्या जैद ओस्याकरीर कैद मेंःल ख्यान्या लेर। १७है जैद परमेस्वरए ओपाँ भरी ओमायोःवा पै ओल उयुँलाव मिताव येन दाव परीन्याए जूनी नो दस राजारालाई तयुँ ज़ जैदचाद याहक भरी नो राछ्यासलाई यान्या

याजैक्यो। १८नो नरँःव पातर्नी मेंमा फरी मानुवाताव राजा भरिराए याडैताव बनै उमिन थासो सहर ज़।”

बेबिलोन सहरए उमिन ज़ माके

१८ आव भरी ओतावत फरी स्वर्गतिन छुत तोबो चाकज्या उहुज़्याव डारँःके। नोए ओहक बनै घेप्पा उलिज़्याव, ओज़गैए आव मानुवालाई ज़गैव ज़ जैक्यो। २नो बनै चोइस अइ लिद किके, “माहान बेबिलोन उमिन ज़ माके, उमिन ज़ माके। नोए ओपो भरी भयार, माछैव पुरूसर स़ोनो युँ माजामो बाज़ार लिन्या पो ज़ ताके। ३प्राइँ राज्यालाव मिँर नोए ओदोज़्याव युँ माजामो येनत फसङ्गिद मँःव मिताव ताकेर। मानुवाताव राजा भरी ब नोस ज़ पातज्या जैसिकेर। मानुवाताव बेपारीरास नो मेंमाए उयुँ मानैधुद उरँःव भरी लँःद ओराएज़्यावए नोर बनै धनी ताकेर।”

४हाःत ज़ स्वर्गत फरी ब छुत तोबो गा अइ लिद ओपाँज्याव डाथैके, “अ डामिनताव डामीर, नो मेंमाए ल्योनी पुलुस्द ओपापत लन्था मादाद तँड

लिच्यो, मानी नोए ओक्याँताव सजार जे जेक्याँत मनी हुन्या ले। ५ नोए ओपापर नम सुइँ:त पै बोर्सिनाद लेर। नो भरी परमेस्वरए मामें:व। ६ है जैद प्रभु, नोलाई ओदोव मितावनी ज़ ओसजा एके, ओदोव येनकिन दोबोर ज़ एयो। मिँरालाई उखुरीनी ओरासवैव भरी ब ओललाई दोबोर ज़ सवैयो। ७ ओल खा सघ्यो:सिद थाँतस ओल्यो, हा:ज़ ओबकम मिलैदद्याद धो खासिद लिन्या जैयो। नोए डादा उयुँल उयुँल है लिज़्या, 'डा रानी ज़ डालिज़्या। राँदी मेंमा मिताव डामाले, सोगो ब खर्क ज़ दान्या डामाले।' ८ है जैद नितावए ओक्याँत तछात ज़ नुल्पा नुल्मार हुद, नोलाई बेथार अनिकालर ताद उयुँर स्यासे तेद में:ए ओज़्यास तान्या ले, काराव ल्यो ताकिन नोलाई फाल्ज़्याव परमेस्वर बनै ओसक्ती ल्यो लिज़्या।

६ "है जैद आव मानुवाताव राजार, सोनो नो मेंमास थाँतस लिद युँ माजामो येन दोवराए नो मेंमालाई याख्याव में:ए उमिकुइ नमदा ज़ ओबाज़्याव रँ:द नोराए यायुँर पा-वा

पा-वा घन्या लेर। १० नोए उदुखलाई मारँ:धुद याछ्याचेए तादाड ज़ च्याँ:सिद अइ लिन्या लेर,

‘हाइ! हाइ! ना:ल्दिउ सहर,
बनै नसक्ती ल्यो बेबिलोन,
तघन्तात ज़ नसजा हुके।’

११ “मानुवाताव बेपारीर मनी यासमानर लँ:ज़्यावर खदम ज़ यातावए पाँकी पाँ घन्या लेर। १२ नो बेपारीराए यासमानर आवर ज़ — सुन चाँदीर, हिरामुतीर, नप नबो कपासे क्वार, रेसम क्वार, घ्यामो सोनो घ्यामज्यासो क्वार, चाव सी डरो सीं, हातीए ओधारार, प्राइँ किसिमलाव ओए: ल्यो सीं जार, लुँए जार, पितले जार, भँए जार, १३ दालचिनीर, मसलार, धुपर, अतरर, ओए: ल्यो मासर, दाखमदचर, मनमर, तामर, हारर, बेधार, घोरार, घोराराए यास्रेल्ज़्याव गद्दीर, बाँदार सोनो मिँर।

१४ है जैद नो बेपारीर,

‘अब ते नयुँए ओपैँज़्याव भरी
उमिन ज़ माके।

नखिमज़्याव मिताव जिली मिलीर,
चाचा नानार कातानी ची
नदैरिज़्याव?’

१८:४ यसै ४८:२०; यर ५०:८; ५१:६,४५ १८:५ उत १८:२०-२१; यर ५१:६

१८:६ भज १३७:८; यर ५०:२६ १८:७-८ यसै ४७:७-६ १८:६-१० इज २६:१६-१७

१८:११ इज २७:३१,३६ १८:१२-१३ इज २७:१२-१३,२२

१५“है जैद ननी धनी ताव बेपारीर
नो मेंमाए ओदैव दुखर रँ:द नोर
याछ्याचेए तादाड ज़ च्याँ:सिद बनै
ज़ लँसिद अइ लिन्या लेर,

१६‘हाइ! हाइ! ना:ल्दिउ सहर

बेबिलोन मेंमा
नप नबो घ्यामो कपासे
क्वार क्वाइसिद लिज़्याव,
हिरामुती सुन चाँदीए
भलैसिद लिज़्याव,

१७कै जैद तघन्तात ज़ ना:काव नधन
सम्पती चुयाप ओताव?’

“नकिन फरी री जहाज चलैज़्याव
कप्तानर, होराए याधूँलावर स़ोनो
री जहाजत आदा होदा लिद बेपार
दाद डासिज़्यावर तादाड च्याँ:सिद,
१८नो सहरनिकाव चाँ:द पुलुस्ज़्याव
मिक्कुइ नमदा ज़ ओबाज़्याव रँ:द नोर
यासोगोए अइ लिद किकेर,

‘हाइ! हाइ! आव अचम्बलाव
ना:ल्दिउ सहर मिताव उपुर
काङ्कु ची उलिज़्याव?’

है लिद, १९याडैनी धुली राल्सिद बनै
पाँकी पाँ लँसिद है लिकेर,

‘हाइ! हाइ! ना:ल्दिउ सहर
ओल्यो।

नो सहरनी ज़ री जहाजत बाज़्याव
भरी ब प्राइँ धनी ताद याल्यो।
कै जैद तघन्तात ज़
चुयाप ओताव?’

है लिकेर।

२०‘खाली जे स्वर्गत लिज़्यावर,
परमेस्वरए छैँव उमीर,
ओसाचीर स़ोनो
अगमबक्त्तार ते,
परमेस्वरए नो मेंमाए ओक्याँताव
ओसोभोव रिसलाई रँ:द
रेंचिके।

काराव ल्यो ताकिन नो मेंमाए
जेउपर्त ओदोव अन्याय
ओसजा परमेस्वरए
याद नैव।’ ”

२१हा:त ज़ तोबो बनै ओर्सा ल्यो
चाकज्याए तोबो बनै घ्यो:व राँथै
लुँ मिताव छींद अइ लिद समुन्द्रल
ख्याक्यो,

“नो घेप्पा बेबिलोन सहर मनी
इतावनी ज़ घेप्पा रिसस
ख्यासिद
आदा बाके लिन्या ज़ तान्या माले।

२२हा:किन नल सारङ्गए गा ब
थास्न्या माले,

१८:१५ इज २७:३१, ३६ १८:१७ इज २७:२६-३० १८:१८ इज २७:३२

१८:१९ इज २७:३०-३४ १८:२० ब्य ३२:४३; यर ५१:४८

१८:२१ यर ५१:६३-६४; इज २६:२१

बाँसुलीए गा ब थास्न्या माले,
 भोंकरए गा ब थास्न्या माले,
 काता गाजा बाजाए गा ज़
 माथास्द साइँसुइँ ज़
 तान्या ले।
 येन दाज्यावराए यायेन ब
 रैंःन्या माले,
 तोबो रँथैए गा ब थास्न्या माले।
 २३ बत्तीए ओपलाँ ब खर्क ज़
 रैंःन्या माले,
 ज्यार रेर दाद यारेंज्याव गा ब
 थास्न्या माले।
 नो सहरलाव बेपारीर आव
 मानुवाताव प्राइँरानी घेप्पार
 याल्यो।
 प्राइँ राज्यालाव मिँर नोए
 ओमोहोननी ज़ भुकिकेर।
 २४ नो सहरल ज़ फरी अगमबत्तार,
 छैव उमीर स़ोनो मानुवात
 यारासैःव भरिराए याभी ब
 नल ज़ रैंःके।”
१९ आव भरी ओतावत स्वर्गत
 बनै घ्योःव माहोल्याराए गा
 अइ यालिज्याव डाथैके,
 “हालेलुया! प्राइँनिकाव मानर,
 प्राइँनिकाव सक्तीर
 गेपरमेस्वरए उमीर ज़।

गेलार्इ बाँचैन्या ब
 उकुइत ज़ लिज्या।
 २ नोए ओफाल्ज्याव भरी ब साचो
 न्यायस ज़ फाल्ज्याव।
 नो मानुवाताव मिँरालार्इ
 युँ माजामो ओयेननी
 बलेःज्याव पातर्नी मेंमालार्इ ब
 थिक सजा ज़ याद नैव।
 परमेस्वरए ओसेवा दोज्याव
 यारासैःव भरिराए याभी नो
 मेंमाए ओक्याँत ज़ लागिस्द,
 याखिस ब नत ज़ सयोःद नैर।”
 ३ हाःत ज़ फरी ब नो माहोल्याराए,
 “हालेलुया, नो पातर्नी मेंमाए
 ओसजानिकाव मिकुइ
 नमदा ओबाज्याव
 खर्क ज़ खेमन्या माले।”
 ४ फरी नो स्वर्गताव राजाए ओड़ाकाव
 चौबीस जना स़ेरर स़ोनो चारता जन्तु
 स्यासोर नो सिंहासनत चुसिद लिज्याव
 परमेस्वरए ओड़ाक फुलुप्सिद,
 “आमेन, हालेलुया,”
 लिद ओसेवा दोकेर।
 पाथाए उबिह्यालाव भत्यार
 ५ हाःत ज़ फरी नो सिंहासनतिन
 तोबो गा अइ लिद हुके,



“अ परमेस्वरए उमिनताव
घेप्पा जिम्ज़ार,
ओयेन दाज्यावर,
ओमान नैदद्याज्यावर,
परमेस्वरए उमिनर
सघ्योःदिचिके।”

६नकिन फरी ब बनै घेप्पा रीए ओर्गा
मिताव, सोनो नम गर्जिज्याव मिताव
बनै घ्योःव माहोल्याराए यार्गा अइ
लिद यापाँज्याव मिताव डाथैके,

“हालेलुया, परमप्रभु,
बनै ओसक्ती ल्यो गेपरमेस्वरए
अब ते ओराज्या चलैन्यात
थूसिके।

७है जैद गे रेंद गेयुरं होलाँ जैद,
उमिनर सघ्योःदद्याव ताके।
अब ते परमेस्वरए ओपाथाए
उबिह्या तान्या बेला ब
हुद ले।

ओब्याहोल्यानी मनी बिह्याए
जूनी भाःसिद ले।

८नोलाई बनै माँत्या तक तकौ
चोखो नप नबो कपासे क्वार
क्वाइसिन्या याद यानैज्याव।”

नो क्वाए ओअर्थ परमेस्वरए छैँव
उमींराए ओल ओसतत लिद यादोव
धर्मलाव येनर ज़।

९हाःत ज़ नो चाकज्याए डालाई है
दाँक्यो, “आव ब सर्के, नो पाथाए
उबिह्यालाव भत्यारल खुल्सिउर
असिक दैवर ज़।” नकिन फरी ब
नोए, “आव भरी परमेस्वरनी हुव
थ०रिउ पाँ ज़ लिज्या।” १०हाःत ज़
डा नो चाकज्याए उखँत फुलुप्सिद धो
डादोक, नोए, “नँ डालाई धो दान्या
माःक, डा मनी नँ नदोज्याव मिताव
सोनो येसुए ओपाँत साची याज्याव
ननैराए यादोज्याव मिताव परमेस्वरए
ओसेवा दाज्याव ची। है जैद नँ ओल
परमेस्वरलाई ज़ धो दोके। गे येसुए
ओपाँत साची याज्याव भरी परमेस्वरए
उपुरूसनी हुव थ०रिउ पाँ याज्यावर
गेलिज्या।”

राजारए याराजा भेंःस्या ताज्या

११हाःत ज़ फरी ब डाभाल्सिक
नम फैसिउ डारँःके। नत तोबो पालो
घोरालाई चेपद नैज्यावलाई ब डारँःके।
नोए उमिन ‘थ०रिउ सतस दोज्याव’
उलिज्याव। नोए न्यायस ज़ मिंरालाई
ओराफाल्ज्याव सोनो लरें ओदोज्याव।
१२नोए उमी मेंःए मुल्का मिताव
उलिज्याव, ओडैत मुकुतर कुधु ज़
जासिसिउ उलिज्याव। नोए ओक्याँत



तोबो मिन सर्सिउ उलिङ्याव। नो मिन ओल वाज्ज ओसैङ्याव, उपुर्कावराए सुए ज्ञ यामासैङ्याव। १३ ओक्याँताव ओक्वाइसिङ्याव ओक्वा भरी भील छिमिसिउ उलिङ्याव। नोए उमिन “परमेस्वरए ओपाँ ज्ञ” नैसिउ उलिङ्याव।

१४ नोए उछींत स्वर्गताव परमेस्वरए ओफौजी भरी बनै माँत्या पाल पालो चोखो कपासे क्वार क्वाइसिसिउर, पालो घोरार चेप्ट याहुङ्याव। १५ नोए आव मानुवाताव राज्यारालाई फूइँन्याए जूँनी ओयाःत बनै छाव तरवाली पुलुसुद उलिङ्याव। नोरालाई चलैन्या फरी उकुइत भँए भुइ ब रैद नैव। नोए ओराफूइँव भरी बनै ओसक्ती ल्यो परमेस्वरए नोरालाई उरिसलाव कोलोल भाःद पीन्या ले। १६ नोए ओक्वात सोनो ओय्यात इताव मिन सर्सिउ उलिङ्याव, “आव प्रभुराए याप्रभु ज्ञ, राजारार एयाराजा ज्ञ।”

मानुवाताव माचाव भरी खदम तान्या ले

१७ हाःत ज्ञ फरी निमीत तोबो चाकज्या च्याँःसिद उलिङ्याव डारँःके। नो बनै चोइस अइ लिद

उक्किङ्याव, “अ नमताव भुज्याव बाजा भरी, परमेस्वरए जैद ओयाचिउ भत्यारल दुप्सिहुचिके। १८ नो भत्यारल जे आव मानुवाताव राजारार यास्यार, यासेनापतीर सोनो याघेप्पाराए यास्यार, याघोरार सोनो नो घोरा चेप्प्यावराए यास्यार, बाँदा माबाँदा, घेप्पा जिम्जार, प्राइँए यास्यार कैव दैन्या जेले।”

१९ नकिन नो उसकताव राछ्यास, मानुवाताव राजार, याफौजीरास दुप्सिद यालिङ्याव डारँःके। नोर नो पालो घोरा चेप्ट नैङ्याव, ओल परमेस्वरए ओफौजीरास लरँ दाना हुद यालिङ्याव। २० हाःत ज्ञ नो राछ्यास नक ज्ञ क्योःसिके। ओल ओसक्ती दैद अचम्बलाव येनर दाद ओपाँ सथैङ्याव ओनै ब क्योःसिके। नो ओनै नो ड़ादाडाव मानुवाताव मिँरालाई राछ्यासए ओछाप भाःदद्याद राछ्यासए उसुरूप जैसिउ अङ्ग्यालाई सेवा दाव परीद मिँरालाई भुकैङ्याव ज्ञ। है जैद परमेस्वरए नोनी नेब्लोलाई ज्ञ गन्धकनी चाँःङ्याव मेंःल जीदो ज्ञ निख्याक्यो। २१ उपुर्काव नीस हुव याफौजीर ते नो पालो घोरा चेप्सिउए ओयाःताव तरवालीनी ज्ञ



सिकेर। नोराए यास्यार कैद नमताव बाजा भरी ब वाँःकेर।

सैतान हजार बर्स पै किद पल्लैसिउ

२० हाःत ज़ फरी तोबो चाकज्या स्वर्गतिन उहु-ज्याव डारँःके। नोए उकुइत नो सुन्द मुन्दौ भल्लादालाव साँचा ब उलिज्याव, बनै घेप्पा भँए साँगल ब उलिज्याव। २नोए नो डादाडाव अजिङ्गरलाई कयोःद तहजार बर्स पै किद नैकयो। नो अजिङ्गर भाःकाव भुकैज्याव घुल, दियाबलस यादो-ज्याव सैतान ज़। ३है जैद नोलाई भल्लादाल ख्याद नो भल्लादालाई कःद तालकुची ब भाःकयो। हाःकिन नो हजार बर्स ओमायोःवा पै सैतानए मानुवाताव मिँरालाई सुलाई ज़ भुकैव दैन्या माले। नो ओयोःवत वाज़ छचावाए जूनी तखेप रास्सिन्या ले।

४हाःत ज़ फरी स्वर्गत सिंहासन मितावर कुधु ज़ डारारँःके। नत चुसिद लिज्यावरालाई फाल्न्या हक यासिउ उलिज्याव। फरी ब डाभाल्सिक परमेस्वरए ओपाँत स्रो नो येसुए ओसाची यान्यात याडै च्रमद यारासैःवराए यापुरूसर ब डारारँःके।

नोर नो राछचास स्रो नो राछचासए उसुरूप जैसिउ अङ्ग्यानी निसेवा ब दाव माभैःकेर, स्रो नो याचाँदीत याकुइत राछचासए ओछाप ब भाःव माभैःकेर। है जैद नोर सिउनी सैसिद ओल ख्रीसस तहजार बर्स पै राज्या दोकेर। ५प्राइँरानी उसं कताव सिद सैसिउर नोर ज़ तान्या लेर। उपुर्काव सिउ भरिर ते नो तहजार बर्स ओयोःवत वाज़ तखेप सैसिन्या लेर।

६है जैद नो उसं कताव पालाकाव सिउनी सैसिज्यावर बनै असिक दैवर परमेस्वरए उयुँलाव मिताव छैँवर लिज्यार। नोर नेखेप सिन्या मालेर। नोर परमेस्वर स्रो नो ख्रीसनी निसेवा दान्यार ताद ओल ख्रीसस तहजार बर्स भरी राज्या चलैन्या लेर।

सैतान खर्क ज़ माजिपिन्या मेंःल
ख्यासिन्या ले

७नो हजार बर्स ओयोःवत सैतान किसिद उलिज्यावनी रास्सिन्या ले। ८ननी रास्सिद नोए आव मानुवाताव चार कोन्याडाव राज्यारालाई, अथबा गोग मागोगरालाई[†] फसङ्गैद लरैँ दाना दुप्द यारैरिज्याव। नोराए याफौजीर समुन्द्रलाव बालुवा स्यासो सुए ज़

†२०:८ गोग मागोग है लिसिउए ओअर्थ — परमेस्वरकिन तँदा जैसिज्याव राज्यार।

२०:२ उत ३:१ २०:४ दान ७:६,२२



मागनिधुन्या तारिज़्यार। ६नोर आव नामलाव तोबो बनै घ्योःव बाँल हुद परमेस्वरए मया ओदोऽयाव यरूसलेमल ज़ उमिनतावरालाई याराधिरिहुरिज़्यार। हाःत ज़ स्वर्गतिन मेंःए मुल्का हुद सैतानए ओरारैव फौजीर चुयाप तारिज़्यार। १०नोरालाई भुकैऽयाव सैतान मनी गन्धकनी चाँऽयाव मेंःल ख्यासिरिऽया। नो मेंःल ज़ नो डादाडाव राछ्यास ब उलिऽयाव, नोए उपुरूसनी पाँद भुकैऽयाव ओनै ब नल ज़ उलिऽयाव। नोर स्रोम्लो खर्क ज़ माजिप्तिन्या मेंःल लाकनी रील गाप गाप तान्या लेर।

मिँ भरी सु सु यायेननी ज़ फाल्सिन्या लेर

११नकिन फरी डाभाल्सिक तोबो बनै घ्योःव पाल पालो सिंहासनत चुसिद लिऽयावलाई डारँःके। नोए ओडाकिन नाम ब धोंःके, नम ब धोंःके। खाली नोनी मोंसिन्या पो ज़ मादैकिनी। १२हाःत ज़ सिउ भरी घेप्पा जिम्ज़ार सिंहासन डाक च्याँःसिद यालिऽयाव डारारँःके। नक फैसिउ पोस्तोकोर ब यालिऽयाव। नोरानी तोबो पोस्तोको ते अजम्बरी जुनीलाव

पोस्तोको उलिऽयाव। हाःत ज़ नो सिउर नो पोस्तोको भरिल यादोव येन सर्सिउनी ज़ फाल्सिकेर। १३नो फाल्न्या बेलाए उजूनी ज़ समुन्द्रल सुद सिउर ब पुलुस्केर, खादरल भाःसिउर ब पुलुस्केर, प्राइँडाव सिउ भरी ज़ पुलुस्केर। नोर ओपोःस ज़ सु सु यायेननी ज़ फाल्सिकेर। १४हाःत ज़ सिन्या सोनो नर्गनी चुयाप जैऽयाव मेंःल ज़ ख्यासिकिनी। नो मेंःल ख्यासिन्या ज़ नेखेप सिन्या। १५है जैद जोए उमिन नो अजम्बरी जुनीलाव पोस्तोकोल ओमासर्सिकिन नो मेंःल ज़ ख्यासिउ परिरिऽया।

परमेस्वरए ओबास मिँरास तान्या ले

२१ हाःत ज़ फरी डाभाल्सिक साःरो नाम नम डारँःके। डादाडाव नाम नम समुन्द्रस ज़ खेम्के। २नकिन तोबो भर रे दाव मेंमा ओरेए जूनी भलैसिउ मिताव छैँव सहर, साःरो यरूसलेम परमेस्वरए ल्योनी स्वर्गतिन उभरिहुऽयाव डारँःके। ३हाःत ज़ स्वर्गताव राजाए ल्योनी तोबो गा बनै चोइस अइ उलिऽयाव डाथैके, “अबकिन परमेस्वरए ओबास मिँरास तारिऽया। है जैद



ओल मिंरास लिद नोरालाई उमीर ज़
जैद ओल यापरमेस्वर ज़ तान्या ले।
४नोरास ज़ लिद यापिलर सीदचाद
खर्क ज़ मासिन्या याजैरिज़्याव।
डादाडाव माचाव भरी नाम नमरास ज़
ओखेमोए अबकिन सोगो दाद घन्या
ब तान्या माले, काताए दुख ब तान्या
माले,” है लिद पाँके।

५नकिन नो सिंहासनत चुसिद
लिज़्यावए है लिके, “अबकिन प्राईं
सा:रो ज़ डाजैरिज़्या।” फरी ब डालाई
है दाँक्यो, “है जैद आव डापाँ ब
सर्के, साचो थोरिउ ज़ लिज़्या। ६नो
डापाँ आव ज़ — अब ते प्राईं यो:के।
डा अल्फा सोनो ओमेगा ज़।[†] डा
प्राईरानी डाताव, प्राईरानी छींताव
डालिज़्या। डापाँत री छोस्ज़्याव
मिंलाई अजम्बरी जुनीलाव री अइज़
याद उरीछो सै:दचान्या डाले। ७है
जैद डा डापाँत जो भें:स्या ताज़्या,
होए नो असिकर दैरिज़्याव। डा होए
ओपरमेस्वर ज़ डातारिज़्या, नो डाज़ा
ज़ तारिज़्या। ८फरी डापाँत छेपोवा
ताज़्यावर, यायुँ माहुपज़्यावर, युँ
माजामो येन दोज़्यावर, मिं सै:ज़्यावर,
पातज्या पातनीर, मन्तर तन्तर

दाज़्यावर, अडग्या पुजा दाज़्यावर,
धुत पाँज़्यावर, नो भरिराए याजुँ
गन्धकनी चाँ:ज़्याव में:ल लिज़्या। है
जैद नेखेप सिज़्यावर आवर ज़।”

सा:रो यरूसलेम

९हा:त ज़ नो याकुइताव खुरील
नुल्पा नुल्मा लिज़्याव सात जना
चाकज्यारानी तोबोए डाल्योक हुद,
“आत हुन्के, डा नँलाई पाथाए
ओब्याहोल्यानी सतेंद डाईरिज़्या,” है
दाद, १०डालाई परमेस्वरए उपुरूसनी
भें:व गोंत लाँद छैँव यरूसलेम सहर
स्वर्गतिन उभरिहुज़्याव सतेंदचाँक्यो।
११नो सहरत परमेस्वरए ओज़गै
उलिज़्याव। नो ज़गै बनै ओए: ल्यो
छैँव यूँखार स्यासो भिलिक भिलिक
ओताज़्याव। १२नो सहर घवाँगिल
बनै भें:व भार्ना उलिज़्याव। नो
भार्नात बाह गोता ग्रामर यालिज़्याव।
नलाव पाल्यार बाह जना चाकज्यार
यालिज़्याव। तोबो तोबो ग्रामत
इसाएली बाह थरराए यामिनर सर्सिउ
उलिज़्याव। १३नो ग्रामर पुर्ब तंदा
सोम्लो, पछ्युँ तंदा सोम्लो, उत्तर
तंदा सोम्लो, दखिन तंदा सोम्लो

†२१:६ दर्सन १:८ चिऊन्या।

२१:३ इज ३७:२७; लेबी २६:११-१२ २१:४ यसै २५:८; ३५:१०; ६५:१६

२१:६ यसै ५५:१ २१:७ २ समू ७:१४; भज ८६:२६-२७ २१:१० इज ४०:२



यालिङ्ग्याव। १४नो सहरए ओभार्ना अदैङ्ग्याव गजलाव लुँर ब बाह गोता यालिङ्ग्याव। नत तोबो तोबो लुँत पाथाए बाह जना ओसाचीराए यामिन सर्सिउ उलिङ्ग्याव।

१५नकिन नो डास पाँङ्ग्याव चाकज्याए नो सहरलाई ओग्रामर ओभार्नारास ज़ गोईँन्याए जूँनी उकुइत सुने ताङ्गा तोबो रैद ओनैङ्ग्याव। १६नो सहरलाई ओगोईँक ओख्यो, ओराँ प्राईँदा ज़ सम सम ताद चार पात्या ताके। नो ताङ्गाए ओगोईँनी ओख्यो ब नेहजार चार सय किलोमितर, ओराँ स्रोनो ओर्भेँ ब हाःज़ ताके। १७नो सहरलाव भार्नाए ओपाता ओगोईँक नो मनी मिँए ओगोईँनी तादी ब, चाकज्याए ओगोईँनी तादी ब, पैँसथी मितर ताके। १८नो भार्नाए उलुँर बनै चाव घ्यामो लुँर यालिङ्ग्याव। सहर भरी ते बनै चाव सुन स्यासो छैँ छैँव यूँखार स्यासो उलिङ्ग्याव। १९नो गजलाव भाःसिउ लुँ भरी बनै याएः ल्यो चाव चावर वाज़ यालिङ्ग्याव। उस०कताव लुँए उमिन स्फतीक ताके। हुकिनकाव लुँ नीर, हुकिनकाव लाल, हुकिनकाव पन्ना, २०हुकिनकाव गोमेद, हुकिनकाव

सारदियस, हुकिनकाव पित्मनी, हुकिनकाव पिरोजा, हुकिनकाव पुस्पराज, हुकिनकाव लसुने, हुकिनकाव धुम्रकान्त, हुकिनकाव मार्तीस। २१नो बाह गोता ग्राम भरी मुतीनी जैसिउ उलिङ्ग्याव। तोबो तोबो ग्राम तोबो तोबो मुतीए ज़ जैसिउ उलिङ्ग्याव। सहरलाव दोहार फरी छैँव सिसा मिताव बनै चाव सुन लैसिउ उलिङ्ग्याव।

२२नो सहर भरिल ते ध्यान फ़िम ते काङ्क ज़ डामारँःके। नलाव ध्यान फ़िम ते परमप्रभु बनै ओसक्ती ल्यो परमेस्वर स्रोनो पाथानी ज़ ची निल्यो। २३नो सहरलाई पलाँव जैँन्या निमीए ओचाहित ब ओमालिङ्ग्याव, स्यावैए ओचाहित ब ओमालिङ्ग्याव। नो सहरलाई पलाँव जैँङ्ग्याव परमेस्वरए ओज़गैँ ज़, सहरलाव बत्ती फरी पाथा ज़। २४हाः बेलाक प्राईँ राज्यालाव मिँर नो ज़गैत ज़ आदा होदा लिन्या लेर। मानुवाताव राजा भरिराए ब यासकाव लिङ्ग्याव चाव चाव भरी ब नल ज़ रैँन्या लेर। २५नो सहरल फरी री खर्क ज़ मातान्या, ला वाज़ ओतावए नलाव ग्रामर ब खर्क ज़ गल्सिन्या मालेर। २६हैँ जैद प्राईँ राज्यानिकाव

यामिन थासो चाव भरी प्राईं नल ज़ हुन्या लेर। २७माचाव, युं माजामो, असत दोज़्यावर ते सु ज़ पसिउ दैन्या मालेर। पाथाए अजम्बरी जुनीलाव ओपोस्तोकोल यामिन सर्सिउर वाज़ पसिन्या लेर।

२२ हाःत ज़ नो चाकज्याए डालाई अजम्बरी जुनी याज़्याव बनै छैं छैंव री हुज़्याव तोबो खोला सतैदचाँक्यो। नो खोला परमेस्वर स्रोनो पाथानी निल्योनी पुलुस्द, २सहर खालाव दोहालाव घ्याँ उहुज़्याव। नो खोला आफी हुफी अजम्बरी जुनी याज़्याव सीर ब यालिज़्याव। नो सीर बाह मास ज़ यासैज़्याव, मैनाए पती छुत छुत सै ज़ ओसैज़्याव। नो सीराए याख्यार फरी प्राईं जातलाव मिंरालाई सगराँन्या वासः ओल्यो। ३अब ते नल काताए सराप ज़ तान्या माले। परमेस्वर स्रोनो पाथानी निसिंहासन नल ज़ ताद परमेस्वरए उमीराए नल ज़ ओसेवा दोरिज़्यार। ४नोराए ओडाः ब रँःधुन्या लेर, उमिन ब याचाँदीत ज़ सर्सिन्या ले। ५नल री ब खर्क ज़ तान्या माले, नोरालाई बत्ती ब चाहिन्या माले, निमी ब चाहिन्या

माले। काराव ल्यो ताकिन ओल माहान परमेस्वरए ज़ ज़गैव जैद याएरिज़्याव। है जैद नोराए ओलस खर्क ज़ माखेम्न्या ओराज्या ब चलैव ज़ नैन्या लेर।

येसु हतप्त ज़ हुन्या ले

६हाःत ज़ नो चाकज्याए डालाई फरी ब है दाँक्यो, “आव पाँ भरी युं हुबो साचो पाँ ज़ लिज़्या। नो भाःकिनकाव ओल ओसक्तीर याद पाँव परींज्याव परमेस्वरए ज़ डा ओचाकज्यालालाई मनी नो चाँदो हुन्या पाँर ओसेवा दोज़्याव उमीरालाई सतैदचान्याए जूनी ज़ परींद नैनाव।”

७येसुए, “हतप्त ज़ डाहुरिज़्या। है जैद आव पोस्तोकोलाव सर्सिउ पाँर धिद दोज़्याव असिक दैव ज़ तारिज़्या,” है लिज़्या।

८आलाव सर्सिउ पाँ भरी थैज़्याव रँःज्याव डा यूहन्ना ज़। आव पाँ भरी डाथैवत डारँःवत नो डालाई सतैदचाज़्याव चाकज्याए उखँत फुलुप्सिद धो डालोनाक ते, ९नोए डालाई भैःद मायाद, “नँ डालाई धो दान्या माःक, डा मनी नँ नदोज़्याव मिताव, परमेस्वरए उपुरूसनी पाँज्याव

ननैर स्रोनो आव पोस्तोकोलाव पाँर भैःद दोज़्यावराए मिताव परमेस्वरए ओसेवा दाज़्याव ची। है जैद बुरू ओल परमेस्वरलाई ज़ धो दोके,” है दाँक्यो।

१०नकिन नोए ज़ फरी ब है दाँक्यो, “आव पोस्तोकोलाव सर्सिउ हुन्या पाँर छाप भाःद ताम्मोयो, काराव ल्यो ताकिन नो योःन्या बेला नजिकक ज़ हुद ले। ११है जैद माचाव येन दाज़्यावराए माचाव यायेन ज़ घदो-ज़्यारक, फुरी लिज़्यावर ब फुरी ज़ घलिज़्यारक। हो मिताव ज़ धर्मलाव येन दोज़्यावराए धर्म ज़ घदोरक, छैँव लिज़्यावर ब छैँव ज़ घलिरक।” १२ओल येसुए है लिज़्या, “डा हतप्त ज़ डाहुरिज़्या, प्राइँ मिँरालाई सु सु यायेनए ओजेला यान्या डास लिज़्या। १३डा अल्फा स्रोनो ओमेगा ज़, प्राइँरानी डाताव, प्राइँरानी छीँताव, ओजरा स्रोनो उतुपा ज़।”

१४है जैद याक्वार छेद छैँवस लिज़्यावर असिक दैवर ज़। नोरालाई स्वर्गताव परमेस्वरए ओसहरल पसिद अजम्बरी जुनी याज़्याव सीए ओसै ज़्यान्या यासिउ लिज़्या।

१५नो सहरकिन पाखाड ते काः मितावर, मन्तर तन्तर दाज़्यावर, पातज्या पातर्नी जैसिज़्यावर, मिँ सैःज़्यावर, अङग्या पुजा दाज़्यावर, माचाहिउ येनत यार्युँ थू जैद असतलाव येनत लिज़्यावर लिज़्यार।

१६“डा येसुए, जे पो पोडाव मन्दलीराए जूँनी आव पाँर सथैन्याए जूँनी डाचाकज्यालाई परींद नैद डायाचिए। दाऊद राजाए ओजरा ब डा ज़, ननी परीव ओखार ब डा ज़, छकालन्याकाव ज़गैव सोम्पा ब डा ज़।”

१७परमेस्वरए उपुरूस स्रोनो पाथाए ओब्याहोल्यानी मानुवाताव मिँरालाई, “हुचिके,” है यारादोज़्यानी। नो पाँ थैज़्यावराए मनी, “हुचिके,” ज़ है उलिरक। है जैद जो री छोस्ज़्या, हो अजम्बरी जुनी याज़्याव री ओपैँवा भरी अइज़ ओना उहुक।

तुपैँन्या पाँर

१८डा यूहन्नाए आव पोस्तोकोलाव सर्सिउ पाँ थैज़्यावरालाई है डादा-चिज़्या — जोए आव सर्सिउकिन छुत आगल्या पाँ चाःज़्याव, होलाई

२२:११ दान १२:१० २२:१२ यसै ४०:१०; ६२:११; भज २८:४; यर १७:१०

२२:१३ यसै ४०:६; ४८:१२ २२:१४ उत २:६; ३:२२ २२:१६ यसै ११:१,१०

२२:१७ यसै ५५:१



परमेस्वरए आव पोस्तोकोलाव
सर्सिउ नुल्पा नुल्मार होए ओक्याँत
ज़ चा·दिरिज़्याव। १६जोए फरी आव
सर्सिउलाई ओघतैकिन, परमेस्वरए
होलाई ज़ आव पोस्तोकोलाव सर्सिउ
नो स्वर्गत लिज़्याव नोए ओपो स्रो
नो अजम्बरी जुनी यान्या सींए ओसैनी
उजुँ मादैन्या जैरिज़्याव।

२० आव डासरो पाँत ओल ओसाची
याज़्यावए है लिज़्या, “डा हतप्त ज़
डाहुरिज़्या।” है जैद डा यूहन्नाए मनी
है डालिज़्या, “हैज़ ओताक, प्रभु येसु,
चाँदो ज़ घुहुनी।”

२१ जे परमेस्वरए उमीरास गेप्रभु
येसुए उयुँ प्राइँए जेल्योदा ओगराँक।
आमेन।

